

**Ligji Nr. 2004/45**

**PËR TË DREJTAT E AUTORIT  
DHE TË DREJTAT E TJERA TË PËRAFËRTA**

Kuvendi i Kosovës

Në bazë të Kreut 5.1 (e), 9.1.26 (a) të Kornizës Kushtetuese për Vetëqeverisje të Përkohshme në Kosovë, (Rregullorja e UNMIK-ut Nr. 2001/9 të datës 15 maj 2001), në pajtim me si dhe me qëllim të mbrojtjes dhe zhvillimit të pronës intelektuale në përgjithësi, dhe të të drejtave të autorit në veçanti,

Miraton:

**LIGJIN PËR TË DREJTAT E AUTORIT  
DHE TË DREJTAT E TJERA TË PËRAFËRTA  
I. DISPOZITAT E PËRGJITHSHME**

**1. Objekti i ligjit**

**Neni I**

Ky ligj përcakton:

1.1. Të drejtat e autorit që, në bazë të pronës intelektuale, u takojnë autorëve përkitazi me veprat e tyre në lëmin e letërsisë, shkencës dhe artit (në vijim: e drejta e autorit);

1.2. Të drejtat që, në bazë të pronës intelektuale, janë të afërta me të drejtën e autorit

(në vijim: të drejtat e afërta ) dhe u takojnë:

- a). interpretuesve përkitazi me interpretimet e tyre;
- b). prodhuesve të fonogrameve përkitazi me fonogramet e tyre;
- c). producentëve të filmit përkitazi me videogramet e tyre;
- d). organizatave të radios e të televizionit (Transmetuesve) përkitazi me emisionet e tyre;
- e). prodhuesve të bazave të të dhënave përkitazi me bazat e tyre të të dhënave
- f). botuesve përkitazi me botimet e tyre;

1.3. Administrimin e së drejtës së autorit dhe të drejtave të afërta;

1.4. Mbrojtjen e së drejtës së autorit dhe të drejtave të afërta;

1.5. Zbatimin e këtij ligji ndaj personave të huaj.

## **2. Parimet e zbatimit**

### **Neni 2**

Masat administrative, inspektimi, mbrojtja juridiko-civile dhe penale, të përcaktuara me këtë ligj, zbatohen në përputhje me rregullat e përgjithshme të procedurës administrative, kundërvajtëse, civile dhe penale.

## **3. Marrëdhënia midis së drejtës së autorit dhe të drejtave të afërta**

### **Neni 3**

3.1. Mbrojtja e parashikuar në këtë ligj për të drejtat e afërta nuk prek dhe nuk ndikon në asnjë mënyrë në mbrojtjen e së drejtës së autorit.

3.2. Dispozitat e këtij ligji lidhur me elementet e së drejtës së autorit, me supozimin e autorësisë, me bashkautorët dhe autorët e veprës së gërshetuar, me përmbajtjen e të drejtave ekonomike të autorit dhe të drejtën në kompensim të veçantë për reprodukim privat ose tjetër vetjak, me marrëdhënien midis së drejtës së autorit dhe së drejtës së pronës mbi ekzemplarët e veprës, me kufizimet e së drejtës së autorit (përfshirë edhe sigurimin e kufizimeve), me llogaritjen e fillimit dhe efektin e mbarimit të kohëzgjatjes së mbrojtjes të së drejtës së autorit, si dhe kalimin e së drejtës së autorit, zbatohen ngjashëm dhe sa u takon (mutatis mutandis) edhe ndaj të drejtave të afërta.

## 4. Përkufizimet

### Neni 4

Në këtë Ligj vlejnë këto përkufizime:

a. **“Punë audiovizuale”** përfshin punët e filmit (punët kinematografike dhe ato të TV-së) dhe punë të tjera audiovizuale.

b. **“Transmetues”** ka kuptimin e personit fizik apo juridik, i cili ka përgjegjësi editoriale për përmbajtjen e shërbimeve programore radio-televizive që duhet të pranohen nga publiku i përgjithshëm dhe që ato t'i transmetojë, apo që i ka transmetuar të tëra dhe të pandryshuara nga pala e tretë.

c. **“Asociacione kolektive”** do të thotë asociacionet e formuara në pajtim me pjesën IV, për të kryer aktivitetet e administrimit të të drejtave të autorit.

d. **“Të drejtat e autorit”** do të thotë të drejtat e bazuara në pronën intelektuale, të cilat u përkasin autorëve lidhur me punën e tyre në fushën letrare, shkencore dhe artistike.

e. **“Baza e të dhënave”** do të thotë grumbullimi i punës së pavarur, i të dhënave apo materialeve të tjera në çfarëdo forme, të radhitur në mënyrë sistematike apo metodologjike, të cilave mund t'i uqasemi individualisht në mënyrë elektronike apo përmes mënyrave të tjera, ku marrja, verifikimi

apo paraqitja e përmbajtjeve të tyre kërkon investime të konsiderueshme kualitative dhe/ose kuantitative.

f. **“Shpalos”** do të thotë kur një vepër e mbrojtur me të drejta të autorit apo material me të drejta të afërta i është vënë në dispozicion publikut me pëlqimin e bartësit të së drejtës.

g. **“Të drejtat morale”** kanë kuptimin e kompetencave ekskluzive personale me të cilat mbrohet pacenueshmëria e veprave të mbrojtura me të drejtat e autorit dhe personaliteti i autorit.

h. **“Zyrë”** do të thotë zyra për të drejtat e pronës intelektuale që duhet të krijohet në pajtim me nenin 169.1 të këtij Ligji.

i. **“Vepra origjinale”** do të thotë pikturat origjinale, kolazhet, vizatimet, tapiceritë, skulpturat, veprat në qeramikë dhe qelq, fotografitë dhe vepra të tjera origjinale të artit.

j. **“Fonogram”** do të thotë incizim i zërit ose sekuencave të zërit në bartësin e zërit.

k. **“Posedues”** do të thotë personi fizik apo subjekti juridik i cili posedon punimin origjinal ose kopjen e punimit origjinal.

l. **“Publik”** do të thotë një numër më i madh i njerëzve të cilët janë jashtë rrethit të zakonshëm të familjes apo rrethit të zakonshëm të njerëzve që i njihni personalisht.

m. **“Botim”** do të thotë kur një sasi e mjaftueshme kopjesh e veprës së mbrojtur me të drejtë të autorit apo e ndonjë materiali me të drejta të afërta është botuar dhe i është ofruar publikut apo është shpërndarë me pëlqimin e bartësit të së drejtës.

n. **“Të drejta të përafërta”** do të thotë të drejtat e bazuara në pronën intelektuale që janë të lidhura me të drejtën e autorit.

o. **“Videogram”** do të thotë incizim i një sekuence të fotografive pa ose me zërin shoqërues në bartësin e fotografisë ose në bartësin e fotografisë dhe të zërit.

**PJESA II**  
**E DREJTA E AUTORIT**

**Kapitulli 1**  
**DISPOZITA TË PËRGJITHSHME**

**Neni 5**

Autorët e veprave në lëmin e letërsisë, shkencës dhe të artit gëzojnë mbrojtjen lidhur me veprat e veta dhe shfrytëzimin e tyre, në përputhje me këtë ligj.

**Neni 6**

6.1. E drejta e autorit është e drejtë e posaçme, e cila i takon autorit si subjekti të pronës intelektuale mbi veprën e vet.

6.2. E drejta e autorit përmban:

- a). autorizimet ekskluzive personale për të mbrojtur pacenueshmërinë e veprës së autorit dhe personalitetin e autorit (në vijim: të drejtat morale të autorit);
- b). autorizimet ekskluzive ekonomike për të mbrojtur interesat ekonomike të autorit (në vijim: të drejtat ekonomike të autorit);

c). autorizimet tjera të autorit (në vijim: të drejtat tjera të autorit).

## **Neni 7**

7.1. E drejta e autorit i takon autorit me vetë faktin e krijimit të veprës.

7.2. Për të gëzuar mbrojtjen e së drejtës së autorit nuk kërkohet plotësim paraprak i çfarëdo formaliteti administrativ.

## **Kapitulli 2**

### **VEPRAT E AUTORIT DHE KUSHTET E MBROJTJES**

#### **1. Veprat e mbrojtura**

## **Neni 8**

8.1. Vepra të autorit janë krijimet intelektuale origjinale në lëmin e letërsisë, të shkencës dhe artit, që janë të shprehura në çfarëdo mënyre, nëse me këtë ligj nuk parashikohet ndryshe.

8.2. Vepra të autorit konsiderohen sidomos:

a). veprat gojore, siç janë fjalimet, leksionet, tregimet dhe vepra të ngjashme të shprehura gojarisht;

b). veprat e shkruara siç janë tekstet në libra, broshurat, gazetat ditore dhe tekste të tjera në lëmin e letërsisë, të literaturës shkencore e profesionale, si dhe programet kompjuterike;

- c). 3)veprat muzikore, me ose pa tekst, pavarësisht a janë të shënuara përmes notave apo në ndonjë mënyrë tjetër;
- d). veprat teatrale, teatrale-muzikore dhe të kukullave, përfshirë edhe radiodramat;
- e). veprat koreografike dhe pantomimore;
- f). veprat filmike (kinematografike dhe televizive) dhe veprat e tjera audiovizuale (në vijim: veprat audiovizuale);
- g). veprat fotografike dhe veprat e bëra ngjashëm procesit fotografik, siç janë fotografitë artistike, fotomontazhet, fotoafishet, fotografitë e reporterëve, etj.;
- h). veprat e artit figurativ në lëmin e vizatimit, të pikturës, grafikës, skulpturës;
- i). veprat e arkitekturës, siç janë skicat, planet, maketat dhe objektet e ndërtuara të veprave arkitekturore dhe të inxhinierisë nga fusha e arkitekturës, urbanizmit, arkitekturës së peizazhit dhe rregullimit të enterierit;
- j). veprat skenografike;
- k). veprat e artit aplikativ, si dhe të dizajnit industrial e grafik;
- l). veprat kartografike (hartat, planet, skicat, demonstrimet tredimensionale ) në lëmin e gjeografisë dhe topografisë;
- m).prezantimet e natyrës shkencore, edukative a teknike (vizatimet teknike, grafikonet, tabelat, ekspertizat, demonstrimet tredimensionale).

## **2. Elementet e veprës së autorit**

### **Neni 9**

9.1. Vepra e autorit e pambaruar, pjesët përbërëse të veprës si dhe titulli i veprës së autorit, që janë vetvetiu krijime intelektuale origjinale, gëzojnë mbrojtje si edhe vetë vepra.

9.2. Nuk është e lejueshme që për titull të veprës së autorit të merret një titull që më parë është përdorur për ndonjë vepër të autorit të llojit të njëjtë, nëse titulli i tillë shkakton ose do të shkaktonte huti lidhur me autorësinë e veprës.

## **3. Veprat e prejardhura**

### **Neni 10**

10.1. Vepër e autorit konsiderohet edhe vepra e prejardhur (e përpunuar ose e formësuar) nëse i plotëson kushtet nga paragrafi (1) i nenit 8. të këtij ligji.

10.2. Vepra të prejardhura janë përkthimet, përshtatjet, aranzhmanet (orkestrimet) muzikore dhe përpunimet e tjera të një vepre tashmë ekzistuese apo materialit tjetër.

10.3. Mbrojtje gëzojnë edhe përkthimet e teksteve ligjore, të vendimeve gjyqësore dhe të akteve administrative, me kusht që përkthimet e tilla të mos jenë bërë për botim zyrtar dhe të mos jenë botuar si të tilla.

10.4. Të drejtat e autorëve të veprave tashmë ekzistuese nuk mund të cenohen me përpunimin e veprave të tyre.

## **4. Koleksionet e veprave**



## **Neni 11**

11.1. Vepër e autorit konsiderohet edhe koleksioni i veprave ekzistuese të autorit ose materialeve të tjera që, për nga përzgjedhja, përshtatja apo bashkërenditja e përmbajtjeve të tyre paraqet krijim origjinal intelektual, përkatësisht vepër të pavarur (enciklopeditë, antologjitë, përmbledhja e citateve, e poezive apo e veprave në prozë, përmbledhja e shprehjeve folklorike, e dokumenteve dhe vendimeve gjyqësore, etj).

11.2. Konsiderohet koleksion edhe baza e të dhënave të veprave të mëvetësishme, të dhënave ose materialeve të tjera, të rregulluara në mënyrë sistematike ose metodike dhe që mund të qasen veç e veç me mjete elektronike apo mjete të tjera.

11.3. Mbrojtja sipas këtij neni nuk zbatohet ndaj programeve kompjuterike të përdorura për bërjen apo funksionimin e bazës elektronike të të dhënave.

11.4. Me ngërthimin e veprave tashmë ekzistuese në koleksion nuk mund të cenohen të drejtat e autorëve të këtyre veprave; me ngërthimin në koleksion materiali ekzistues nuk bëhet vepër e mbrojtur.

## **5. Krijimet pa mbrojtje**

### **Neni 12**

Mbrojtja juridike e të drejtave të autorit nuk përfshinë:

- a). idetë, parimet, udhëzimet, procedurat, zbulimet ose konceptet matematikore si të tilla;
- b). ligjet zyrtare, aktet nënligjore dhe rregullativat e tjera;
- c). materialet zyrtare dhe botimet e organeve parlamentare, qeveritare dhe të organizatave tjera që kryejnë funksione publike;
- d). përkthimet zyrtare të rregullativave dhe materialeve tjera zyrtare, si dhe të marrëveshjeve ndërkombëtare dhe instrumenteve të tjera.
- e). parashtrësat dhe aktet e tjera në procedurat administrative ose gjyqësore;

- f). materialet zyrtare të botuara për informim të publikut;
- g). shprehjet folklorike;
- h). lajmet e ditës dhe informacionet e ndryshme që kanë karakter të raportimeve të rëndomta të shtypit.

## **Kapitulli 3**

### **AUTORI**

#### **1. Personi fizik**

##### **Neni 13**

Autor është personi fizik i cili e ka krijuar veprën.

#### **2. Supozimi i autorësisë**

##### **Neni 14**

14.1. Personi, emri i të cilit, përkatësisht firma, pseudonimi apo shenja e tij është shënuar në ekzemplar të veprës ose është theksuar me rastin e publikimit të veprës, supozohet autor i veprës, respektivisht titullar i së drejtës, derisa nuk provohet ndryshe.

14.2. Të drejtat e autorit në veprat e botuara, autori i të cilave është i panjohur (vepra anonime dhe vepra e botuar me pseudonim apo shenjë), supozohet se është i autorizuar t'i realizojë botuesi, përderisa nuk zbulohet identiteti i autorit. Po që se edhe botuesi mbetet anonim, supozohet se është i autorizuar t'i realizojë personi që ka bërë publikimin e veprës.

14.3. Zbatimi i paragrafit paraprak 2 pushon po që se provohet identiteti i autorit. Bartësit e së drejtës se supozuar të autorit ia përcjellin autorit përfitimet përkatëse, nëse me kontratë nuk parashikohet ndryshe. Të drejtat që paraprakisht i kanë fituar personat e tretë mbeten në fuqi.

### **3. Koautorët**

#### **Neni 15**

15.1. Nëse vepra e autorit që përbën tërësi të pandashme është krijuar në bashkëpunim të dy a më shumë personave, ata konsiderohen koautor të veprës së tillë.

15.2. E drejta e autorit mbi veprën e koautorëve u takon bashkërisht të gjithë koautorëve dhe administrohet me pëlqimin e të gjithë atyre, nëse në këtë ligj ose me kontratë nuk parashikohet ndryshe.

15.3. Koautori nuk mund të kundërshtojë pa ndonjë arsye dhënien e pëlqimit të vet për publikimin ose shfrytëzimin e veprës. Në mungesë të marrëveshjes, asnjë nga koautorët nuk mund t'i administrojë ndaras të drejtat..

15.4. Marrëdhëniet e koautorëve përkitazi me pjesët e tyre në ndarjen e përfitimit ekonomik nga shfrytëzimi i veprës përcaktohen në përpjesëtim me kontributet e secilit prej tyre në krijimin e veprës, nëse me kontratë nuk parashikohet ndryshe.

15.5. Nëse ndonjëri nga koautorët heq dorë nga pjesa e tij në përfitimet ekonomike, shtohen pjesët e koautorëve të tjerë në përpjesëtim me madhësitë fillestare.

### **4. Autorët e veprave të gërshetuara**

#### **Neni 16**

16.1. Nëse dy a më shumë autorë bashkojnë veprat e tyre me qëllim të shfrytëzimit të përbashkët ose për disa forma të shfrytëzimit (p.sh. muzika e teksti, muzika e koreografia, veprat e shkruara dhe ilustrimet etj.), secili prej tyre gëzon të drejtën e autorit lidhur me kontributin e vet.

16.2. Marrëdhëniet midis autorëve të veprave të gërshetuara rregullohen me kontratë.

16.3. Dispozitat e paragrafëve 3 deri 5 të nenit 15 të këtij ligji, zbatohen në mënyrë analoge (mutates mutandis), edhe ndaj autorëve të veprave të gërshetuara.

## **Kapitulli 4**

### **TË DREJTAT MORALE**

#### **1. E drejta e publikimit të parë**

##### **Neni 17**

17.1. Autori ka të drejtë ekskluzive të vendosë nëse, kur dhe në çfarë mënyre do të publikohet për herë të parë vepra e tij.

17.2. Derisa vepra të mos publikohet me pëlqimin e tij, autori ka të drejtë ekskluzive t'ia kumtojë publikut ose të përshkruaj përmbajtjen e veprës së tij.

#### **2. E drejta e njohjes së autorësisë**

##### **Neni 18**

18.1. Autori ka të drejtë ekskluzive të njihet dhe të shënohet si autor i veprës.

18.2. Autori ka të drejtë të vendosë nëse vepra e tij do të shënohet me emër, pseudonim apo me ndonjë shenjë të tij.

#### **3. E drejta e respektimit të integritetit të veprës**

## **Neni 19**

Autori ka të drejtë ekskluzive të kundërshtojë çfarëdo deformimi, gjymtimi apo shfrytëzimi të veprës, nëse me këtë mund të fyhet nderi dhe fama krijuese e tij.

## **4. E drejta e pendimit**

### **Neni 20**

20.1. Autori mund të tërheqë të drejtën ekonomike që ia ka kaluar tjetrit, nëse për këtë ka arsye serioze morale, me kusht që titullarit të së drejtës t'ia kompensojë dëmin real të shkaktuar nga tërheqja e tillë e së drejtës.

20.2. Me zbatimin e së drejtës së pendimit, e drejta ekonomike e titullarit shuhet. Ky zbatim ndodh me pagesën e dëmshpërblimit.

20.3. Autori duhet të kompensoj dëmin adekuat titullarit të së drejtës. Titullari i së drejtës duhet që, brenda tre muajve nga dita e pranimit të paralajmërimit për tërheqjen e së drejtës, ta njoftojë autorin për masën e dëmit të pësuar nga tërheqja e së drejtës. Nëse titullari nuk vepron kështu, e drejta e pendimit zbatohet me mbarimin e afatit.

20.4. Nëse autori më vonë dëshiron që përsëri të bëjë kalimin e të drejtave lidhur me shfrytëzimin e veprës së tij, dhe nëse nuk kanë kaluar dhjetë vjet nga përdorimi i së drejtës së pendimit, duhet së pari dhe nën kushte të mëparshme t'i ofrojë të drejta të llojit të njëjtë bartësit të tyre të mëparshëm.

20.5. Dispozitat e këtij neni nuk zbatohen për programet kompjuterike, veprat audiovizuale dhe për baza të të dhënave.

## **Kapitulli 5**

### **TË DREJTAT EKONOMIKE**

## **1. E drejta e shfrytëzimit dhe format e saj**

### **Neni 21**

21.1. Autori ka të drejtë ekskluzive për shfrytëzimin ekonomik të veprës së tij në çfarëdo forme, si dhe t'ua lejojë a ndalojë personave të tjerë shfrytëzimin e veprës së tij, nëse në këtë ligj nuk parashikohet ndryshe.

21.2. Personat e tjerë mund të shfrytëzojnë veprën e autorit vetëm në bazë të autorizimit të autorit për kalimin e të drejtave ekskluzive dhe nën kushtet e vendosura prej tij, nëse në këtë ligj nuk parashikohet ndryshe.

21.3. Për çdo kalim të së drejtës për shfrytëzimin e veprës autorit i takon kompensimi, nëse në këtë ligj ose me kontratë nuk parashikohet ndryshe.

### **Neni 22**

22.1. Vepra e autorit mund të shfrytëzohet në formë lëndore, jolëndore dhe të modifikuar.

22.2. Shfrytëzimi i veprës në formën lëndore përfshin sidomos të drejtat pasuese ekskluzive të autorit:

- a). të drejtën e reprodukimit (neni 23),
- b). të drejtën e shpërndarjes (neni 24),
- c). të drejtën e qiradhënies (neni 25).

22.3. Shfrytëzimi i veprës në formë jolëndore (komunikimi publikut) përfshin sidomos të drejtat pasuese ekskluzive të autorit:

- a). të drejtën e interpretimit publik (neni 26);
- b). të drejtën e transmetimit publik (neni 27);
- c). të drejtën e komunikimit publik nga fonogramet dhe videogramet (neni 28);
- d). të drejtën e shfaqjes publike (neni 29);
- e). të drejtën e emetimit radioteleviziv (neni 30);
- f). të drejtën e rimetimit radioteleviziv (neni 31);
- g). të drejtën e emetimit të mëtejshëm të emisionit (neni 32);
- h). të drejtën e vënies së veprës në dispozicion të publikut (neni 33).

22.4. Shfrytëzimi i veprës në formën e ndryshuar përfshin sidomos të drejtat pasuese ekskluzive të autorit:

- a). të drejtën e përpunimit (neni 34);
- b). të drejtën e përshtatjes audiovizuale (neni 35).

## **2. Shfrytëzimi i veprës në formën lëndore**

### **2.1. E drejta e reprodukimit**

#### **Neni 23**

23.1. E drejta e reprodukimit është e drejtë ekskluzive e autorit që të lejojë apo ndalojë fiksimin e veprës së tij ose të ekzemplarit të veprës në mbajtës lëndor, të bërë drejtpërdrejt apo tërthorazi, përkohshëm apo përhershëm, në çfarëdo mënyre apo forme, në tërësi apo pjesërisht dhe pavarësisht nga numri i ekzemplarëve.

23.2. Vepra është e reprodukuar sidomos kur bëhet përmes shumëzimit grafik (shtypshkrimit), reprodukimit tredimensional, shkrirjes, fotografimit, fiksimit audio ose video, shënimit (regjistrimit) elektronik, etj.

23.3. Ndërtimi i objektit arkitekturor sipas projektit konsiderohet akt reproduktimi.

## **2.2. E drejta e shpërndarjes**

### **Neni 24**

24.1. E drejta e shpërndarjes është e drejtë ekskluzive e autorit që përkitazi me origjinalin apo ekzemplarët e veprës së tij të lejojë a ndalojë çdo formë të shpërndarjes me qëllim të shitjes apo tjetërsimit, përfshirë edhe ofertën për këtë qëllim nëse nuk parashihet ndryshe me këtë ligj dhe kontratë.

24.2. Me shitjen e parë ose tjetërsimin në formë tjetër të pronësisë mbi origjinalin apo ekzemplarin e veprës në Kosovë ose në Bashkimin Evropian dhe jashtë saj, që është bërë nga autori ose me pëlqimin e tij, e drejta e shpërndarjes për atë origjinal apo ekzemplar të veprës është e shterur në Kosovë dhe në Bashkimin Evropian dhe jashtë saj.

## **2.3. E drejta e qiradhënies**

### **Neni 25**

25.1. E drejta e qiradhënies është e drejtë ekskluzive e autorit të lejojë a ndalojë që origjinali apo ekzemplarët e veprës së tij të jepen në shfrytëzim për afat të caktuar, përmes përfitimit të drejtpërdrejtë apo të tërthortë ekonomik.

25.2. Dispozitat nga paragrafi paraprak 1 i këtij neni nuk zbatohen për shfrytëzimin e:

- a). veprës së ndërtuar arkitekture;



- b). origjinalit ose të ekzemplarëve të veprave të arteve aplikative dhe të dizajnit industrial;
- c). në rast shikimi të atypëratyshëm të origjinalit ose të ekzemplarëve të veprës në hapësira të institucionit.

25.3. Autori i cili të drejtën e vet të qiradhënies ia kalon prodhuesit të fonogrameve apo producentit të filmit, mban të drejtën e kompensimit të drejtë nga qiradhënia.

### **3. Shfrytëzimi i veprës në formën jolëndore**

#### **3.1. E drejta e interpretimit publik**

##### **Neni 26**

26.1. E drejta e interpretimit publik është e drejtë ekskluzive e autorit të lejojë a të ndalojë recitimin publik, ekzekutimin muzikor publik ose shfaqjen publike të veprës së vet.

26.2. E drejta e recitimit publik është e drejta e komunikimit të veprave të shkruara apo gojore përmes recitimit apo leximit drejtpërdrejt (in vivo) para publikut.

26.3. E drejta e ekzekutimit muzikor publik është e drejta e komunikimit të veprës muzikore përmes ekzekutimit drejtpërdrejt para publikut.

26.4. E drejta e shfaqjes publike është e drejta e komunikimit të veprave skenike (teatrore, teatrore-muzikore, koreografike, pantomimore etj.) drejtpërdrejt para publikut.

#### **3.2. E drejta e transmetimit publik**

##### **Neni 27**

E drejta e transmetimit publik është e drejtë ekskluzive e autorit të lejojë a të ndalojë që recitimet, interpretimet ose shfaqjet e veprës së tij të transmetohen përmes altoparlantit, ekranit ose një mjeti tjetër, publikut që gjendet jashtë vendit ose hapësirës burimore.

### **3.3. E drejta e komunikimit publik nga fonogramet ose videogramet**

#### **Neni 28**

E drejta e komunikimit publik nga fonogramet ose videogramet është e drejtë ekskluzive e autorit të lejojë a ndalojë që vepra e tij, e cila është fiksuar në fonogram apo videogram, t'i komunikohet publikut me anë të mjeteve teknike për reproduktim të tingullit, përkatësisht pamjeve ose të tingullit dhe pamjeve.

### **3.4. E drejta e paraqitjes publike**

#### **Neni 29**

E drejta e paraqitjes publike është e drejtë ekskluzive e autorit të lejojë a ndalojë që me mjete teknike t'i komunikohet publikut vepra e tij audiovizuale, vepra fotografike, vepra figurative, vepra e arteve aplikative dhe dizajnit industrial, vepra koreografike dhe prezantimet e natyrës shkencore apo teknike.

### **3.5. Transmetuesi dhe transmetimi satelitor**

#### **Neni 30**

30.1. Transmetuesit që e transmetojnë programin e tyre nga transmetues të vendosur në territorin e Kosovës do të mbrohen përmes këtij Ligji.

30.2. Autorët dhe bartësit e të drejtave të përafërta, vepra e të cilëve ose materialet me të drejta të përafërta u komunikohen publikut me satelit do të mbrohen përmes këtij Ligji, kur nën kontrollin dhe përgjegjësinë e Transmetuesi sinjalet për bartjen e programit përkatës dërgohen nga territori i Kosovës në satelit dhe poshtë në tokë, përmes zinxhirit të pandërprerë të komunikimit.

30.3. Mirëpo, mbrojtja e ofruar përmes këtij Ligji zbatohet edhe kur kushti nga paragrafi paraprak nuk përmbushet:

- a. kur stacioni ndërlidhës nga i cili transmetohen sinjalet për bartjen e programit është vendosur në Kosovë ose
- b. kur Transmetuesi i cili ka bartur komunikatën tek publiku me satelit është ligjërisht i regjistruar në Kosovë.

### **3.6. Ritransmetimi**

#### **Neni 31**

31.1. E drejta për të ritransmetuar një material të transmetuar përmes programit ritransmetues të njëhershëm, të pandryshuar dhe të pa shkurtuar me kabël, me sistem mikrovalor ose përmes mënyrave të tjera ("ritransmetim") do të ushtrohet nga asociacioni kolektiv. Kjo nuk zbatohet për të drejtat që Transmetuesi i ushtron lidhur me transmetimet e veta.

31.2. Autori i cili i ka dhënë të drejtën e ritransmetimit Transmetuesit ose regjisorit të fonogramit ose videogramit do të mbrohet përmes këtij Ligji.

31.3. Çdo person apo subjekt juridik i cili ritransmeton fonogramin ose audiogramin ka barrën për të dëshmuar se ka bërë marrëveshje valide kontraktuese për të ritransmetuar materialin e transmetuar.

### **3.7. E drejta e emetimit të mëtejme**

#### **Neni 32**

E drejta e emetimit të mëtejme radioteleviziv është e drejtë ekskluzive e autorit të lejojë a ndalojë që vepra e tij, e cila tashmë emetohet përmes radiotelevizionit ose i vihet në dispozicion publikut, t'i komunikohet më tutje publikut përmes altoparantit, ekranit ose një mjeti të ngjashëm (p.sh. në mjete të transportit publik, restorante, salla apo paradhoma të pritjes, etj.)

### **3.8. E drejta e vënies së veprës në dispozicion të publikut**

#### **Neni 33**

E drejta e vënies së veprës në dispozicion të publikut është e drejtë ekskluzive e autorit të lejojë a të ndalojë, që vepra e tij t'i vihet në dispozicion publikut përmes përcjelljes me tel apo pa tel, në mënyrën e cila i mundëson individit nga publiku që veprës t'i qaset nga vendi dhe në kohën që ai e zgjedhë (komunikimi interaktiv).

## **4. Shfrytëzimi i veprës në formën e ndryshuar**

### **4.1. E drejta e përpunimit**

#### **Neni 34**

34.1. E drejta e përpunimit është e drejtë e autorit të lejojë a të ndalojë përkthimin, përshtatjen skenike, përshtatjen muzikore apo përpunimin e veprës së tij në mënyrë tjetër, me qëllim të krijimit të një vepre të prejardhur.

34.2. E drejta e parashikuar në paragrafin (1) të këtij neni zbatohet edhe në rastet kur vepra e autorit, në formë të pandryshuar, përfshihet apo ngërthehet në një vepër të re.

34.3. Autori i veprës burimore mban të drejtën ekskluzive për shfrytëzimin e veprës së tij në versionin e përpunuar, nëse në këtë ligj ose me kontratë nuk parashikohet ndryshe.

### **4.2. E drejta e përshtatjes audiovizuale**

## **Neni 35**

E drejta e përshtatjes audiovizuale është e drejtë ekskluzive e autorit të lejojë a ndalojë që vepra e tij të përshtatet apo të shfrytëzohet për t'u fiksuar në vepër audiovizuale.

## **Kapitulli 6**

### **TË DREJTAT E TJERA TË AUTORIT**

#### **1. E drejta e qasjes dhe e ekspozimit**

##### **Neni 36**

36.1. Autori ka të drejtë t'i qaset origjinalit apo ekzemplarit të veprës së tij që është në zotërim të personit tjetër (në vijim: zotëruesi), kur kjo i nevojitet për ta reprodukuar apo përpunuar veprën, dhe po qe se me këtë nuk preken thelbësisht interesat e arsyeshme të zotëruesit.

36.2. Autori mund të bëjë kërkesë nga zotëruesi i origjinalit të veprës së tij figurative ose fotografike që t'ia dorëzojë atë përkohësisht, me qëllim të ekspozimit, bazuar në marrëveshjet që mund të arrijnë palët.

36.3. Dhënien përkohësisht të origjinalit, në përputhje me paragrafin paraprak (2) të këtij neni, zotëruesi mund ta kushtëzojë me dhënien e garancionit monetar të mjaftueshëm, ose me lidhje të kontratës për sigurim në lartësi të vlerës në treg të origjinalit.

36.4. Autori është i detyruar të kujdeset që mënyra e qasjes së veprës ose ekspozimi i saj të rezultojë me sa më pak shqetësime për zotëruesin. Në rast se dëmtohet origjinali ose ekzemplari i veprës, autori mban përgjegjësi objektive edhe pa qenë i fajshëm për dëmtimin.

#### **2. E drejta e suitës (droit de suit)**

## Neni 37

37.1. Në rast të rishitjes së origjinalit të veprës artistike pas tjetërsimit të parë të saj nga ana e autorit, autori ka të drejtë të jetë i njoftuar për rishitje, si dhe të drejtë në kompensim në shumën e përcaktuar me këtë nen.

37.2. Detyrimin e kompensimit sipas paragrafit paraprak e përmbushin në mënyrë solidare: shitësi, blerësi dhe ndërmjetësuesi që merret me shitjen e veprave artistike (p.sh. shitoret e veprave të artit, galeritë e artit, shtëpitë aksionare etj.).

37.3. Vepra artistike origjinale, sipas paragrafit (1) të këtij neni, konsiderohen: pikturat origjinale, kolazhet, vizatimet, tapiceritë, skulpturat, krijimet nga qeramika dhe qelqi, fotografitë si edhe vepra të tjera artistike origjinale. Kopjet e veprave të këtilla konsiderohen origjinale nëse janë të krijuara ose të autorizuar si të tilla nga vetë autori si dhe të bëra në numër të kufizuar dhe sipas rregullit të numërtuara dhe firmosura nga autori.

37.4. Kompensimi për të drejtën e suitës paguhet në përqindje të çmimit shitës të origjinalit në treg (pa tatim), por me kusht që çmimi shitës të kalojë 2.000 €.

37.5. Përqindja nga paragrafi paraprak (4) caktohet sipas njësive pasuese të çmimit, me atë që shuma e përgjithshme e kompensimit nuk mund të jetë më e lartë se 12.500 €:

- a). 4% nga pjesa e çmimit shitës mbi 2.000 € deri në 50.000 €;
- b). 3% nga pjesa e çmimit shitës mbi 50.000 € deri në 200.000 €;
- c). 1% nga pjesa e çmimit shitës mbi 200.000 € deri në 350.000 €;
- d). 0.5% nga pjesa e çmimit shitës mbi 350.000 € deri në 500.000 €;
- e). 0.25% nga pjesa e çmimit shitës mbi 500.000 €.

37.6. E drejta e suitës nuk mund të jetë lëndë e braktisjes ose e kalimit, në të gjallë të autorit, e as lëndë e përmbarimit të detyrueshëm.

### **3. E drejta e huazimit publik**

#### **Neni 38**

38.1. E drejta e huazimit publik është e drejtë e autorit në kompensim të arsyeshëm, kur origjinali ose ekzemplari i veprës së tij vihet në dispozicion përmes institucionit publik, për t'u përdorur për kohë të caktuar dhe pa përfitim të drejtpërdrejtë a të tërthortë ekonomik.

38.2. Paragrafi paraprak nuk zbatohet për përdorim të:

- a). origjinalit ose të ekzemplarëve të veprës në bibliotekat e shkollave të të gjitha niveleve;
- b). veprave të ndërtuara arkitekturore;
- c). origjinalit ose ekzemplarëve të veprës së arteve aplikative dhe dizajnit industrial;
- d). origjinalit ose ekzemplarëve të veprës në hapësirat e institucionit publik për qëllim të shikimit të atypëratyshëm;
- e). qëllimit të huazimit ndërmjet institucioneve publike.

38.3. Huazimi publik i origjinalit ose i ekzemplarëve të programeve kompjuterike dhe bazave të të dhënave është e drejtë ekskluzive e autorit të tyre.

### **4. E drejta për kompensim të veçantë**

#### **Neni 39**

39.1. Në rastet kur vepra e autorit, varësisht nga natyra e saj, mund të riprodhohet edhe për përdorim privat në kuptim të nenit 45 të këtij ligji në formë të realizimit audio ose video, autori ka të drejtë pjesëmarrjeje në kompensim të veçantë për riprodhimin e veprës.

39.2. Kompensimi i veçantë nga paragrafi paraprak për fiksime të tingullit ose të pamjes paguhet:

- a). me rastin e shitjes së parë ose importimit të pajisjeve të reja për fiksime të tingullit ose të pamjes;

- b). me rastin e shitjes së parë ose importimit të mbartësve të rinj të zbrazët të tingullit ose të pamjes.

39.3. Kompensimi i veçantë nga paragrafi (1) i këtij neni për fotokopjim paguhet:

- a). me rastin e shitjes së parë ose importimit të aparateve të reja për fotokopjim, dhe
- b). për secilën fotokopje, nëse është bërë me pagesë, duke marrë parasysh numrin e mundshëm të tyre gjatë një viti.

39.4. Me termat audio ose videofiksim, si dhe fotokopjim, nga ky nen, nënkuptohen edhe teknikat e tjera të ngjashme të reprodukimit.

39.5. E drejta në kompensim të veçantë nuk mund të jetë lëndë e braktisjes ose e kalimit, në të gjallë të autorit, e as lëndë e përmbarimit të detyrueshëm.

## **Neni 40**

40.1. Kompensimin e veçantë në kuptim të nenit paraprak 39 të këtij ligji e paguajnë: prodhuesit e pajisjeve për fiksim të tingullit dhe të pamjes, prodhuesit e pajisjeve për fotokopjim, prodhuesit e mbartësve të zbrazët të zërit ose të pamjes, si dhe zotëruesit e aparateve fotokopjuese që ofrojnë ose bëjnë shërbime fotokopjimi me pagesë. Krahas prodhuesve, debitorë solidarë janë shitësit dhe importuesit e pajisjeve të tilla dhe të mbartësve të zbrazët të tingullit ose pamjes, përveç kur importimi i tyre bëhet për përdorim privat ose jo komercial, si pjesë e bagazhit personal (de minimis imports).

40.2. Prodhuesit nga paragrafi paraprak (1) i këtij neni nuk janë të detyruar të paguajnë kompensim të veçantë për ato aparate ose mbartës të zbrazët të tingullit apo të pamjes që i eksportojnë.

40.3. Personat nga paragrafi (1) i këtij neni janë të detyruar t'i dërgojnë Zyrës nga neni 169, 170 i këtij ligji të dhënat lidhur me llojin dhe numrin e aparateve dhe të mbartësve të zërit ose të pamjeve që i kanë shitur ose importuar, si dhe të dhënat për numrin e fotokopjeve të shitura, të cilat nevojiten për të llogaritur kompensimin e veçantë.



## **Neni 41**

41.1. Shumat e përgjithshme të kompensimeve të veçanta sipas nenit 39 të këtij ligji, që u takojnë të gjithë titullarëve të të drejtave, sipas këtij ligji, i miraton Qeveria e Kosovës. Me kontratë të posaçme mes Zyrës dhe shoqatave të shfrytëzuesve mund të caktohen tarifa të veçanta të këtyre kompensimeve.

41.2. Shumat e kompensimeve të veçanta nga paragrafi paraprak caktohen ndaras: për çdo aparat për fiksime të tingullit dhe për çdo aparat për fiksime të pamjes (përfshirë p.sh. edhe kompjuterët personal); për çdo lloj të mbartësve të fiksimit të tingullit ose pamjeve në varësi me kapacitetin e mundshëm dhe qëndrueshmërinë e fiksimit (përfshirë p.sh. CD-Rome, DVD dhe mbartësit e ngjashëm), për çdo aparat fotokopjimi (përfshirë p.sh. edhe faks aparatet, skenerët etj.) në varësi me kapacitetin e tyre (numrin e kopjeve në minutë) dhe mundësinë e fotokopjimit me ngjyra (në shumën e dyfishuar nga kopjimi bardhezi), si dhe për çdo faqe të kopjuar.

41.3. Shumat nga paragrafi (1) i këtij neni caktohen në vlera nominale të parasë. Me rastin e caktimit të lartësisë së tyre merret parasysh shtrirja e mundshme e pranisë së masave mbrojtëse efektive teknologjike në treg.

## **Kapitulli 7**

### **KUFIZIMET E SË DREJTËS SË AUTORIT**

#### **I. DISPOZITA TË PËRBASHKËTA**

## **Neni 42**

42.1. Kufizimet e së drejtës së autorit sipas këtij kapitulli nënkuptojnë se një vepër mund të shfrytëzohet:

a). pa leje të autorit dhe pa pagesë të kompensimit përkatës (në vijim: shfrytëzim i lirshëm ), ose

b). pa leje të autorit, por me pagesë të kompensimit përkatës.

42.2. Kufizimet e së drejtës së autorit vlejnë vetëm në rastet e parapara shprehimisht në këtë kapitull, ndërsa qëllimi dhe mënyra e shfrytëzimit kufizohet me synimin të cilit i shërben, me kusht që të mos jetë në kundërshtim me shfrytëzimin normal të veprës dhe të mos cenohen në mënyrë të paarsyeshme interesat e ligjshme të autorit.

42.3. Në rastet kur shfrytëzimi i veprave lejohet sipas dispozitave të këtij kapitulli, duhet patjetër të shënohet emri i autorit dhe burimi, përveç kur kjo është objektivisht e pamundur ose kur shprehimisht e përjashton ky ligj.

## **II. SHFRYTËZIMI I LIRSHËM**

### **1. Zbatimi i procedurave zyrtare**

#### **Neni 43**

Është i lirshëm shfrytëzimi i veprës për nevoja të sigurimit publik ose për rrjedhat e rregullta të veprimit apo raportimit në procedurat administrative, parlamentare ose gjyqësore, pa qenë e domosdoshme të shënohet emri i autorit dhe burimi prej nga është marrë vepra.

### **2. Mësimdhënia**

#### **Neni 44**

Vetëm për qëllim të ilustrimit të mësimdhënies nëpër shkollat e të gjitha niveleve, ndërsa në suazë të synimit jo komercial, është i lirshëm:

- a). interpretimi publik i veprave të publikuara nëse kjo është formë e drejtpërdrejtë e mësimdhënies në shkollë;
- b). interpretimi publik i veprave të publikuara në kremtimet shkollore pa pagesë, me kusht që interpretuesit nuk kompensohen për këtë.
- c). komunikimi i veprave nga fonogramet dhe videogramet për qëllime të mësimdhënies;
- d). riprodhimi i pjesëve të shkurta të veprave të publikuara, për qëllime të mësimdhënies së drejtpërdrejtë ose për provime;
- e). emetimi i mëtejshëm radioteleviziv i emisioneve shkollore;
- f). riprodhimi i emisioneve shkollore radiotelevizive në fonograme ose videograme, vetëm për qëllime të mësimdhënies së drejtpërdrejtë në hapësirat e institucionit shkollor.

### **3. Riprodhimi privat dhe vetjak**

#### **Neni 45**

45.1. Në kuptim të nenit 39 të këtij ligji, riprodhimi i veprave të publikuara është i lirshëm nëse bëhet deri në tre ekzemplarë dhe nëse janë përmbushur kushtet sipas paragrafit (2) dhe (3) të këtij neni;

45.2. Personi fizik mund të riprodhojë lirshëm një vepër:

- a). në çfarëdo mbartësi, nëse këtë e bën për përdorim privat dhe pa interes të drejtpërdrejtë apo të tërthortë komercial, si dhe nëse ekzemplarët e tillë nuk do t'i shpërndahen apo komunikohen publikut;
- b). në letër apo në mbartës tjetër të ngjashëm, me përdorim të fotokopjimit ose të një teknike të ngjashme fotografike;

45.3. Bibliotekat publike, arkivat publike, muzetë dhe institucionet arsimore apo shkencore, mund të riprodhojnë lirshëm veprën në çfarëdo bartësi lëndor, nëse riprodhimin e bëjnë nga ekzemplari që zotërojnë dhe pa interes komercial të drejtpërdrejtë apo të tërthortë;

45.4. Pavarësisht nga dispozitat e paragrafëve paraparak 1, 2 dhe 3 të këtij neni, nuk lejohet riprodhimi i veprës së shkruar në vëllim të plotë të librit, partiturave muzikore, bazës elektronike të të dhënave, programeve kompjuterike dhe në formë të veprave të ndërtuara arkitekturore, nëse në këtë ligj ose me kontratë nuk parashikohet ndryshe.

45.5. Pavarësisht nga dispozitat e paragrafit paraparak 4 të këtij neni, por në përputhje me kushtet nga paragrafi (1) i këtij neni, lejohet:

- a). riprodhimi i plotë i një libri, nëse ekzemplarët e shtypur janë të shitur të paktën dy vjet më parë;
- b). transkriptimi i fletëve muzikore me shkrim dore.

#### **4. Regjistrimet kalimtare radiotelevizive**

##### **Neni 46**

46.1. Transmetuesi i cili ka leje për emetimin e veprës mund ta riprodhojë lirshëm me mjetet vetjake këtë vepër në fonogram apo videogram dhe ta emetojë prapë një herë.

46.2. Regjistrimi i veprës nga paragrafi paraprak duhet të shlyhet patjetër brenda një muaji nga dita e emetimit të veprës.

46.3. Regjistrimi i veprës nga paragrafi (1) i këtij neni mund t'i dorëzohet arkivit publik nëse ka vlerë të jashtëzakonshme dokumentare. Transmetuesi duhet ta informojë patjetër dhe menjëherë autorin për dorëzimin e tillë të regjistrimit.

#### **5. Njerëzit me aftësi të kufizuara**

##### **Neni 47**

Është i lejueshëm riprodhimi, shpërndarja dhe komunikimi i veprës së publikuar në dobi të njerëzve me aftësi të kufizuara, por në masën që dikton paaftësia specifike. Shfrytëzimi i këtillë është i lejueshëm me kusht që të jetë në lidhje të drejtpërdrejtë me paaftësinë specifike, që vepra

në fjalë të mos jetë vënë ende në dispozicion në formatin adekuat, si dhe që të mos bëhet për interes të drejtpërdrejtë apo të tërthortë komercial.

## **6. Ceremonitë dhe festimet**

### **Neni 48**

Është i lirshëm shfrytëzimi i veprës gjatë ceremonive fetare dhe në festimet zyrtare që organizohen nga autoriteti publik.

## **7. Rastet e veçanta të shfrytëzimit të lirshëm**

### **Neni 49**

49.1. Është e lirshme bërja e punëve të përkohshme në reprodukimin e veprës të cilat janë kalimtare ose përcjellëse, që janë pjesë përbërëse dhe thelbësore e ndonjë procesi teknologjik, që nuk kanë rëndësi të mëvetësishme ekonomike dhe kanë të vetmin qëllim të mundësojnë që vepra:

- a). të transmetohet në rrjet midis palëve të treta nëpërmjet ndërmjetësuesit, ose
- b). të shfrytëzohet ligjshëm.

49.2. Është i lirshëm shfrytëzimi i veprës së publikuar në material tjetër, nëse aty përfshihet rastësisht dhe nuk paraqet element thelbësor të atij shfrytëzimi.

## **8. E drejta e informimit publik**

### **Neni 50**

Për të pasur qasje të lirë në informim të karakterit publik, është i lirshëm:

- a). reprodukimi, shpërndarja dhe komunikimi për publikun i veprës së parë apo të dëgjuar që paraqet pjesë përbërëse të ngjarjes për të cilën raportohet, por pa kaluar masën e raportimit për ngjarjen e ditës;
- b). reprodukimi dhe komunikimi për publikun, në mënyrë të shkurtër, në formë recensione apo ndonjë referim tjetër i përmbajtjes së veprave të publikuara të autorit;
- c). shfrytëzimi i pjesëve të shkurta të shkëputura nga komente të ndryshme dhe artikuj të tjerë të publikuar në masmedia, në formë të pasqyrimit të temave të ditës (pasqyra e shtypit);
- d). shfrytëzimi i fjalimeve politike dhe i fjalimeve të tjera të mbajtura në debate publike, në masën e qëllimit informativ.

## **9. Citimet**

### **Neni 51**

Është i lejueshëm shfrytëzimi në veprën vetjake i pjesëve të shkëputura nga një vepër e huaj e publikuar, ose vepra e plotë e huaj e publikuar në lëmin e fotografisë, të arteve figurative, dizajnit industrial, arkitekturës, arteve aplikative dhe kartografisë, nëse kjo ka të bëjë me kritikën apo shtjellimet në veprën e vet të autorit, me kusht që kjo të jetë në përputhje me parimet e vetëdijes dhe ndershmërisë.

## **10. Përpunimet e lirshme**

### **Neni 52**

Përpunimi i veprës është i lejueshëm:

- a). nëse ka të bëjë me përpunim privat apo tjetër vetjak, i cili nuk është në dispozicion të publikut;

b). për përpunim në parodi apo karikaturë, nëse kjo nuk krijon apo nuk mund të krijojë huti në lidhje me burimin;

c). nëse përpunimi përkon me shfrytëzim të lejueshëm dhe me qëllimin e ligjshëm.

## **11. Katalogët**

### **Neni 53**

Është i lirshëm reprodukimi dhe shpërndarja në katalogë i veprave të ekspozuara të arteve figurative, arteve aplikative dhe dizajnit industrial, si dhe i veprave fotografike që botohen nga organizatori për të promovuar ekspozitën ose aukcionin, duke përfshirë çfarëdo interesi komercial të drejtpërdrejtë apo të tërthortë.

## **12. Veprat e vendosura në vende publike**

### **Neni 54**

Veprat e vendosura përhershëm në rrugë publike, në sheshe, parqe dhe në vende të tjera ku ka qasje të përgjithshme publike, mund të shfrytëzohen lirshëm.

Shfrytëzimi i veprave nga paragrafi paraprak nuk është i lejueshëm të bëhet në formë tredimensionale ose për qëllim të njëjtë si vepra burimore, e as për interes komercial të drejtpërdrejtë apo të tërthortë.

## **13. Demonstrimi i pajisjeve**

### **Neni 55**

Në punëtori, shitore, panaire dhe ofiçina të riparimit është i lejueshëm reprodukimi i veprës në fonogram apo video, si dhe komunikimi i veprave për publikun, por vetëm në masën e

domosdoshme për demonstrimin e punës së pajisjeve që prodhohen, shiten ose riparohen në hapësira të tilla.

## **14. Bazat e të dhënave**

### **Neni 56**

56.1. Shfrytëzuesi i ligjshëm i bazës së publikuar të të dhënave ose i ekzemplarit të saj mundet lirshëm ta reprodukojë ose të bëjë ndryshime në atë bazë të të dhënash, me kusht që kjo të jetë e nevojshme për t'iu qasur përmbajtjes së saj dhe shfrytëzimit normal të kësaj përmbajtjeje. Kur shfrytëzuesi është i autorizuar që të shfrytëzojë vetëm një pjesë të bazës së të dhënave, kjo dispozitë zbatohet vetëm në lidhje me atë pjesë.

56.2. Çdo përcaktim kontraktues në kundërshtim me paragrafin paraprak është i pavlefshëm.

## **III. LICENCAT LIGJORE**

### **1. Librat e leximit dhe tekstet shkollore**

#### **Neni 57**

Me pagesë të kompensimit përkatës është i lejueshëm riprodhimi dhe marrja e pjesëve të shkëputura të veprës së publikuar të autorit, respektivisht i veprave të publikuara veç e veç nga lëmi i arteve figurative, fotografisë, arkitekturës, arteve aplikative dhe dizajnit industrial, si dhe i kartografisë, në libra leximi dhe tekste shkollore që përmbajnë vepra të më shumë autorëve dhe që i dedikohen mësimdhënies në shkolla të të gjitha niveleve.

### **2. Komentet radiotelevizive dhe artikujt e shtypit**

#### **Neni 58**



Me pagesë të kompensimit përkatës është i lejueshëm komunikimi publik, reprodukimi dhe qarkullimi në mjete të informimit publik, i komenteve të caktuara radio dhe televizive, fotografive dhe artikujve të shtypit që janë publikuar në mjete të tjera të informimit, nëse kanë të bëjnë me aktualitete politike, ekonomike, religjioze ose të natyrës të ngjashme dhe nuk përmbajnë klauzolën e rezervimit të së drejtës.

### **3. Emetimi i veprës nga fonogramet e botuara**

#### **Neni 59**

I lejohet Transmetuesit emetimi i veprave nga fonogramet e botuara, me kusht që, para emetimit, me Asociacionin kolektiv të ketë lidhur kontratë për lartësinë, mënyrën dhe afatin e pagesës së kompensimit.

### **4. Institucionet sociale**

#### **Neni 60**

Me pagesë të kompensimit përkatës, është i lejueshëm reprodukimi dhe emetimi i mëtejshëm i emisioneve radiotelevizive në azilet e të moshuarve, në spitale, burgje dhe institucione të ngjashme sociale.

### **5. Sigurimi i kufizimeve të të drejtave**

#### **Neni 61**

61.1. Nëse titullari i të drejtave zbaton masa teknologjike në kuptim të dispozitave të këtij ligji, ai është i detyruar që shfrytëzuesit të kufizimeve të të drejtave nga nenet 43 deri 47 dhe neni 60 të këtij ligji, me kërkesën e tij, por jo më vonë se 14 ditë nga dita e paraqitjes së saj, t'ia vërë në dispozicion mjetet për shfrytëzim të këtyre kufizimeve, por me kusht që ato të përdoren vetëm në masën e domosdoshme dhe që shfrytëzuesi të ketë qasje të ligjshme në veprën e mbrojtur apo në lëndë nga të drejtat e afërta.

61.2. Nëse titullari i të drejtave nuk e përmbush detyrimin në kuptim të paragrafit paraprak shfrytëzuesi ose shoqata e shfrytëzuesve mund t'i drejtohen gjyqit kompetent.

61.3. Paragrafët e mësipërm të këtij neni nuk zbatohen:

- a). nëse titullari i së drejtës, vullnetarisht ose sipas kontratës, i ka vënë shfrytëzuesit në dispozicion mjetet për të shfrytëzuar kufizimet e të drejtave të këtilla, në masë të kënaqshme dhe të domosdoshme;
- b). ndaj masave teknologjike të zbatuara gjatë përmbushjes së detyrimeve të shfrytëzuesve të të drejtave nga paragrafët e mësipërm të këtij neni;
- c). ndaj veprave të vëna në dispozicion të publikut sipas kushteve të kontraktuara, në mënyrën që pjesëtarëve të publikut u është e mundur qasja nga vendi dhe në kohën që ata e zgjedhin individualisht.

## **Kapitulli 8**

### **KUFIZIMET E KOHËZGJATJES TË SË DREJTËS SË AUTORIT**

#### **1. Afati i kohëzgjatjes**

##### **Neni 62**

62.1. E drejta e autorit zgjatë gjatë gjithë jetës së autorit dhe 70 vjet pas vdekjes së tij.

62.2. E drejta e autorit ndaj veprës anonime ose me pseudonim zgjatë 70 vjet që nga dita e shpalljes së ligjshme të veprës.

62.3. Nëse dihet padyshim se kush është autor i veprës me pseudonim, ose në rast se autori brenda afatit nga paragrafi paraparak zbulon identitetin e vet, vlen afati nga paragrafi (1) i këtij neni.

62.4. E drejta e autorit në veprën e bashkautorëve zgjatë 70 vjet që nga dita e vdekjes së bashkautorit i cili ka vdekur i fundit.

62.5. E drejta e autorit në veprën kolektive zgjatë 70 vjet pas publikimit të ligjshëm të veprës.

62.6. Kur afati nuk rrjedh që nga vdekja e autorit, ndërsa vepra nuk ka qenë ligjshëm e publikuar, e drejta e autorit zgjatë 70 vjet që nga krijimi i saj.

62.7. Nëse fillimi i afatit të kohëzgjatjes së të drejtës së autorit llogaritet që nga dita e publikimit të ligjshëm, ndërkaq që vepra është publikuar në vëllime, pjesë-pjesë, në vazhime ose në episode, afatet e mbrojtjes rrjedhin ndaras për secilin nga këto elemente.

62.8. Ndryshimet jo qenësore gjatë përzgjedhjes, korrigjimit apo renditjes së përmbajtjes së koleksionit të veprave nuk e zgjasin afatin e mbrojtjes të së drejtës në koleksion.

62.9. Afatet nga ky nen llogariten që nga 1 janari i vitit që pason vitin në të cilin ndodh ngjarja e cila është relevante për fillimin e afatit.

## **2. Efekti i mbarimit të afateve**

### **Neni 63**

Me mbarimin e afatit të kohëzgjatjes nga ky kapitull, vepra e autorit kalon në domenin publik dhe në shfrytëzim të lejueshëm.

### **3. E drejta e publikimit dhe e drejta e pendimit**

#### **Neni 64**

Pavarësisht nga dispozitat e nenit 62 të këtij ligji, e drejta e publikimit të parë dhe e drejta e pendimit zgjasin derisa autori të jetë gjallë.

### **4. E drejta e autorësisë dhe e integritetit të veprës**

#### **Neni 65**

Pavarësisht nga dispozitat e nenit 62 dhe 63 të këtij ligji, detyrimi për përfilljen e së drejtës së autorësisë (neni 18) dhe të drejtës së integritetit të veprës (neni 19) zgjatë pa kufizim kohor.

## **Kapitulli 9**

### **KALIMI I TË DREJTAVE TË AUTORIT**

#### **I. DISPOZITA TË PËRGJITHSHME**

##### **1. Moskalimi i të drejtave morale**

#### **Neni 66**

Të drejtat morale të autorit nuk mund të kalohen prej autorit në persona të tjerë.

##### **2. Trashëgimi i së drejtës së autorit**

#### **Neni 67**

Të drejtat ekonomike dhe të drejtat e tjera, si dhe zbatimi i të drejtave morale që zgjasin pas vdekjes së autorit, kalohen në përputhje me dispozitat për trashëgimi.

### **3. Kalimi i të drejtave ekonomike të autorit**

#### **Neni 68**

Të drejtat ekonomike dhe të drejtat e tjera të autorit janë pjesë përbërëse e pasurisë së titullarit të tyre dhe mund të jenë objekt i kalimit juridik

### **4. Titullari i të drejtave ekonomike**

#### **Neni 69**

69.1. Autori është titullari i parë i të gjitha të drejtave ekonomike dhe të drejtave të tjera mbi veprën e vet.

69.2. Përveç autorit, titullar i të drejtave nga paragrafi paraprak 1 i këtij neni mund të jetë edhe personi fizik apo juridik në të cilin kalohen këto të drejta mbi bazë ligjore ose me veprim juridik.

### **5. Zotërimi juridik**

#### **Neni 70**

Të drejtat të cilat i njihen me ligj autorit, duke përfshirë këtu edhe mbrojtjen gjyqësore, i takojnë titullarit tjetër, sipas llojit dhe në masën që i kalohen me ligj apo me veprim juridik, nëse në këtë ligj nuk parashikohet ndryshe.

### **6. Përmbarimi i detyrueshëm**

## **Neni 71**

71.1. E drejta e autorit, vepra e pakryer, origjinalet e pa publikuara dhe dorëshkrimi i veprës nuk mund të jenë objekt i përmbarimit të detyrueshëm.

71.2. Lëndë e përmbarimit të detyrueshëm mund të jenë vetëm përfitimet ekonomike nga e drejta e autorit.

## **7. Marrëdhënia e së drejtës së autorit me të drejtën e pronësisë**

## **Neni 72**

72.1. E drejta e autorit është e pavarur nga e drejta e pronësisë mbi sendin ku është e përfshirë vepra e autorit, nëse në këtë ligj nuk është parashikuar ndryshe.

72.2. Kalimi veç e veç i të drejtave ekonomike të autorit dhe të drejtave të tjera mbi veprën e autorit nuk ndikon në të drejtën e pronësisë mbi sendin ku është përfshirë vepra e autorit, nëse në këtë ligj apo me kontratë nuk parashikohet ndryshe.

72.3. Kalimi juridik i sendit ku është e përfshirë vepra e autorit nuk ndikon në të drejtat e veçanta ekonomike dhe të drejtat e tjera të autorit mbi atë vepër, nëse në këtë ligj apo me kontratë nuk parashikohet ndryshe.

## **Neni 73**

Në pasurinë e përbashkët të bashkëshortëve bien vetëm përfitimet ekonomike që dalin nga shfrytëzimi i së drejtës së autorit.

## **Neni 74**

Pronari i veprës së ndërtuar arkitekturore mund ta përpunojë lirshëm atë vepër.

## **Neni 75**

75.1. Pronari që synon të asgjësojë origjinalin e veprës së autorit dhe kur ka baza të supozojë se autori ka interes të arsyeshëm që të ruhet origjinali, nuk mund ta asgjësojë origjinalin e këtillë para se t'ia ketë ofruar autorit. Pronari nuk mund të kërkojë me tepër se që është vlera reale e materialit.

75.2. Nëse është e pamundur të kthehet origjinali, pronari mund ta asgjësojë atë, por duhet t'ia mundësojë autorit bërjen e kopjes e veprës në shpenzime të autorit.

75.3. Pronari i veprës së ndërtuar arkitekturore mund ta asgjësojë atë vepër, ndërkah autori ka të drejtën ta fotografojë dhe të kërkojë t'i dorëzohen kopjet e planeve në shpenzime të veta.

75.4. Dispozitat e këtij neni nuk ndikojnë në mbrojtjen e veprës sipas dispozitave për trashëgiminë kulturore.

## **II. E DREJTA KONTRAKTORE E AUTORIT**

### **1. Kontrata për të drejtat e autorit**

## **Neni 76**

76.1. Autori mund t'ia kalojë personit tjetër të drejtat ekonomike për shfrytëzim të veprës së tij, përmes lidhjes së kontratës apo veprimit tjetër juridik, nëse në këtë ligj nuk parashikohet ndryshe.

76.2. Kontrata e së drejtës së autorit përmban sidomos: emrat e palëve, titullin, përkatësisht identifikimin e veprës së autorit që është objekt i kontratës, të drejtat, përkatësisht format e shfrytëzimit që janë objekt i kalimit, lartësinë e kompensimit të autorit, si dhe afatet dhe mënyrën e pagesës, kufizimet eventuale të përmbajtjes, shtrirjes territoriale dhe kohëzgjatjes.

76.3. Ndaj kontratës së të drejtës së autorit zbatohen dispozitat e së drejtës së detyrimeve, nëse në këtë ligj nuk parashikohet ndryshe.

## **2. Vëllimi i kalimit**

### **Neni 77**

77.1. Kalimi i disa të drejtave ekonomike mund të bëhet me kufizime në përmbajtjen, rajonin e caktuar (territorialisht) dhe kohëzgjatjen (në afat të caktuar).

77.2. Kalimi i të drejtave ekonomike mund të jetë ekskluziv ose jo ekskluziv.

77.3. Kalimi ekskluziv e autorizon vetëm marrësin e së drejtës që, në mënyrën e përcaktuar me kontratë, të shfrytëzojë veprën e autorit, duke përjashtuar të gjithë personat e tjerë, përfshirë edhe autorin.

77.4. Kalimi joekskluziv e autorizon marrësin e së drejtës që, në mënyrën e përcaktuar me kontratë, të shfrytëzojë veprën e autorit, krahas autorit dhe cilitdo person tjetër që është titullar i së drejtës së autorit.

77.5. Pavarësisht nga dispozitat e paragrafëve të mësipërme, kalimi ekskluziv i të drejtave të shfrytëzimit të veprës së caktuar nuk e ndalon autorin ta shfrytëzojë atë vepër në koleksion të veprave të zgjedhura të tij, apo në koleksion të të gjitha veprave të tij.

77.6. Kalimi joekskluziv, të cilin autori e ka lejuar para se të ketë bërë kontratë për kalim joekskluziv, mbetet i vlefshëm ndaj marrësit të së drejtës ekskluzive, nëse me kontratë midis autorit dhe marrësit të së drejtës ekskluzive nuk është parashikuar ndryshe.

## **3. Supozimi i masës së kalimit të të drejtave**

### **Neni 78**



78.1. Nëse me ligj a me kontratë nuk është specifikuar se kalimi i të drejtave është ekskluziv ose joekskluziv, konsiderohet se kalimi është joekskluziv.

78.2. Nëse me ligj a me kontratë nuk është specifikuar shtrirja territoriale, konsiderohet se vlen vetëm për territorin e Kosovës.

78.3. Nëse me ligj apo me kontratë nuk është specifikuar se cilat të drejta veç e veç kalohen, ose në çfarë mase kalohet një e drejtë, konsiderohet se janë kaluar ato të drejta dhe në atë masë që është thelbësore për të arritur synimin e kontratës.

#### **4. Kalimi i mëtejme**

##### **Neni 79**

79.1. Personi që me anë të kalimit ka fituar të drejtën ekonomike ose një të drejtë tjetër të autorit nuk mundet pa leje të autorit të bëjë kalim të mëtejme të të drejtave të tilla në një person të tretë, nëse me kontratë nuk parashikohet ndryshe.

79.2. Leja sipas paragrafit paraprak nuk është e nevojshme, në rast se kalimi i mëtejme është pasojë e shitjes, bankrotit ose likuidimit të rregullt të personit juridik i cili është titullar i së drejtës.

79.3. Kalimi i së drejtës së caktuar për të shfrytëzuar veprën nuk nënkupton edhe kalimin e së drejtës në kompensim të autorit, në rastet kur shfrytëzimi i veprës së autorit mund të bëhet pa leje të autorit, por me detyrim të pagesës së kompensimit të autorit (licenca ligjore).

79.4. Nëse sipas ligjit a me kontratë është i lejueshëm kalimi i mëtejme, pa pajtim të autorit, para marrësi i së drejtës dhe titullari i ri i së drejtës mbajnë përgjegjësi solidare ndaj autorit për përmbushjen e detyrimeve nga kontrata për kalim.

## **5. Rregulla e kalimeve të veçuara**

### **Neni 80**

80.1. Kalimi i një të drejte ekonomike a një të drejte tjetër të autorit nuk ndikon në kalimin e të drejtave të tjera, nëse në këtë ligj a me kontratë nuk parashikohet ndryshe.

80.2. Me rastin e kalimit të së drejtës për reprodukim të veprës nuk kalohet edhe e drejta e regjistrimit të saj në formën elektronike si dhe e drejta për fiksime të zërit apo të pamjeve, nëse në këtë ligj a me kontratë nuk parashikohet ndryshe.

80.3. Me rastin e kalimit të së drejtës për qiradhënie të fonogramit, përkatësisht videogramit të veprës së autorit, autori mban të drejtën në kompensim për çdo qiradhënie të veprës. Autori nuk mund të heqë dorë nga kjo e drejtë.

## **6. Supozimi i kalimit të bashkëlidhur**

### **Neni 81**

Me rastin e kalimit të së drejtës për reprodukim të veprës, konsiderohet se është kaluar edhe e drejta për shpërndarjen e ekzemplarëve të saj, nëse me kontratë nuk parashikohet ndryshe.

## **7. Kalimi i së drejtës për botime periodike**

### **Neni 82**

82.1. Nëse autori kalon të drejtat të veta në formë të përfshirjes së veprës së tij në koleksionin që botohet periodikisht, konsiderohet se botuesi ka fituar të drejtën ekskluzive të reprodukimit dhe shpërndarjes të veprës.

82.2. Në rastin nga paragrafi paraprak kalimi bëhet ekskluziv pas një viti nga dita e botimit periodik.

## **8. Pavlefshmëria**

### **Neni 83**

Konsiderohen të pavlefshme përcaktimet kontraktuese me të cilat autori bën kalimin e të drejtave të mëposhtme:

- a). të drejtën e autorit si tërësi;
- b). të drejtat morale të autorit;
- c). të drejtat ekonomike mbi të gjitha veprat e ardhshme të tij;
- d). të drejtat ekonomike për forma ende të panjohura të shfrytëzimit të veprës së tij.

## **9. Formaliteti**

### **Neni 84**

84.1. Kontratat dhe veprimet e tjera juridike me anë të të cilave bëhet kalimi i të drejtave ekonomike dhe të drejtave tjera të autorit, ose jepen autorizime për shfrytëzim të veprës, duhet të bëhen në formë të shkruar, nëse me ligj nuk parashikohet ndryshe.

84.2. Në rast të mosveprimit sipas paragrafit paraprak definimet e diskutueshme a të paqarta të marrëveshjes gojore interpretohen në favor të autorit.

## **10. Kompensimi ose honorari i autorit**

### **Neni 85**

85.1. Kompensimi ose honorari i autorit mund të caktohet: në shumë të njehershme (paushall), në varësi me masën e shfrytëzimit të veprës, në varësi me efektet ekonomike të shfrytëzimit të

veprës, në varësi me madhësinë apo cilësinë e veprës ose me kombinimin e këtyre metodave, si dhe duke marrë parasysh edhe kushtet e tjera që mund të ndikojnë në lartësinë e tij.

85.2. Nëse kompensimi ose honorari i autorit nuk është caktuar me kontratë, caktohet sipas pagesave të zakonshme për llojin e veprës, sipas masës dhe kohëzgjatjes së shfrytëzimit të veprës si dhe rrethanave të tjera.

## **11. E drejta në revizionin e kompensimit të shpërpjesëtuar**

### **Neni 86**

86.1. Në rast se fitimprurja nga shfrytëzimi i veprës është në shpërpjesëtim të dukshëm me kompensimin e kontraktuar në shumë të njëhershme (paushall), autori ka të drejtë të kërkojë ndryshimin e kontratës, në kuptim të caktimit më të drejtë të hises në fitim.

86.2. E drejta nga paragrafi paraprak vjetërsohet në afat prej dy vjetësh nga dita e marrjes së njohurisë për ekzistimin e kompensimit të shpërpjesëtuar, por më së largu në afat prej dhjetë vjetësh pas kalimit të së drejtës së shfrytëzimit të veprës së autorit.

86.3. Autori nuk mund të heqë dorë nga e drejta e tij sipas paragrafit (1) të këtij neni.

## **12. Detyrimi për të mbajtur evidencë**

### **Neni 87**

87.1. Në rast se kompensimi është përcaktuar në varësi me fitimin e realizuar nga shfrytëzimi i veprës, shfrytëzuesi i së drejtës së autorit duhet patjetër të mbajë librin përkatës dhe evidencat e tjera të kontabilitetit, prej ku është e mundur të konstatohen të ardhurat e realizuara.

87.2. Shfrytëzuesi i veprës është i detyruar që autorit apo përfaqësuesit të tij t'ia mundësojë kontrollin e evidencave nga paragrafi paraprak, ndërsa në afatet eaktuara dhe të paktën një herë në vit t'i dërgojë edhe raporte të sakta lidhur me realizimin e të ardhurave.

### **13. Revokimi i së drejtës ekonomike**

#### **Neni 88**

88.1. Autori ka të drejtë të tërheqë të drejtën e dhënë për shfrytëzim, nëse titullari i së drejtës ekskluzive e ka shfrytëzuar atë të drejtë në masë të pamjaftueshme ose nuk e ka shfrytëzuar fare, me çka janë dëmtuar dukshëm interesat e arsyeshme të autorit, nëse në këtë ligj nuk parashikohet ndryshe.

88.2. Autori nuk mund të vërë në veprim të drejtën e revokimit para se të kenë kaluar dy vjet nga dita kur ka bërë kalimin e së drejtës së shfrytëzimit ose ka dorëzuar ekzemplarën e veprës, nëse ky dorëzim është bërë pas lidhjes së kontratës. Nëse ka të bëjë me artikull për shtypin ditor, ky afat është tre muaj, ndërsa për shtypin periodik - një vit.

88.3. Autori mund të vërë në veprim të drejtën e revokimit vetëm pasi ta ketë paralajmëruar marrësin e së drejtës për revokimin pasues dhe t'i ketë lënë një afat plotësues dhe të arsyeshëm për të shfrytëzuar të drejtën e dhënë.

88.4. Me të bërë të revokimit, e drejta e dhënë për shfrytëzim të veprës shuhet.

88.5. Autori duhet patjetër që marrësit të së drejtës t'ia kompensojë në mënyrë të drejtë dëmin e shkaktuar me revokimin e së drejtës.

88.6. Autori nuk mund të heqë dorë nga e drejta e revokimit në kuptimin e këtij neni.

### **III. KONTRATA TË VEÇANTA PËR TË DREJTËN E AUTORIT**

#### **1. KONTRATA E BOTIMIT**

## **1. Lënda e kontratës**

### **Neni 89**

89.1. Me kontratë botimi autori ia kalon të drejtën botuesit për t'ia riprodhuar veprën e tij me anë të shtypshkrimit dhe të drejtën për shpërndarje të ekzemplarëve të veprës, ndërkohë botuesi merr për detyrim të bëjë riprodhimin dhe shpërndarjen e veprës si dhe, për këtë, t'i paguajë autorit kompensimin.

89.2. Në rastin kur vepra nuk është e publikuar, me kontratë për botim të veprës konsiderohet se është dhënë pëlqimi edhe për publikimin e saj.

89.3. Me kontratë për botim botuesi mund të autorizohet edhe për përkthim të veprës në një gjuhë tjetër, si dhe për riprodhim dhe shpërndarje të saj.

89.4. Kontrata për botimin, lëndë e së cilës është botimi i artikujve, vizatimeve, karikaturave dhe kontributeve tjera të autorit në shtypin ditor dhe atë periodik, nuk është e domosdoshme të bëhet në formë të shkruar.

89.5. Përfaqësuesi i autorit mund të lidhë kontratë për botim vetëm për ato vepra që janë caktuar shprehimisht në autorizimin e autorit.

## **2. Përmbajtja e kontratës**

### **Neni 90**

90.1. Kontrata për botim të veprës përmban sidomos:

- a). afatin brenda të cilit autori detyrohet t'ia dorëzojë botuesit dorëshkrimin ose një ekzemplar tjetër të veprës, në mënyrë që botuesit t'ia mundësojë botimin e veprës. Nëse me kontratë nuk është përcaktuar ndryshe, ky afat është një vit nga dita e lidhjes së kontratës;

- b). afatin brenda të cilit botuesi detyrohet të nisë nxjerrjen në treg të ekzemplarëve të veprës. Nëse me kontratë nuk është përcaktuar ndryshe, ky afat është një vit që nga dita e pranimit të dorëshkrimit a të një ekzemplari tjetër të rregullt të veprës;
- c). numrin e botimeve të cilat botuesi është i autorizuar t'i nxjerrë. Nëse me kontratë nuk është përcaktuar ndryshe, botuesi ka të drejtë në një botim;
- d). afatin brenda të cilit botuesi, pas shterjes së botimit të parë, është i detyruar të nisë nxjerrjen në treg të ekzemplarëve të botimit të ardhshëm, nëse kjo është paraparë në kontratë. Nëse në kontratë nuk është përcaktuar ndryshe, ky afat është një vit që nga dita kur autori ka kërkuar një gjë të tillë;
- e). dukjen dhe faqosjen teknike të ekzemplarëve të veprës.

90.2. Nëse kompensimi është i caktuar në përqindje nga çmimi me pakicë i ekzemplarëve të shitur, në kontratën për botim të veprës duhet të caktohet tirazhi i botimit të parë. Nëse kjo nuk është caktuar, supozohet se vepra është botuar në të paktën 5.000 ekzemplarë.

90.3. Nëse kompensimi është caktuar në shumë të njëhershme (paushall), në kontratë duhet patjetër të caktohet tirazhi i përgjithshëm i ekzemplarëve që do të shtypen. Nëse kjo nuk është caktuar apo nuk rezulton nga qëllimi i kontratës, doket profesionale apo rrethanat e tjera, botuesi mund të riprodhojë dhe të shpërndajë deri në 500 ekzemplarë.

### **3. Detyrimet e botuesit**

#### **Neni 91**

Botuesi ka për detyrë:

- a). të kujdeset për shitjen e ekzemplarëve dhe për këtë ta informojë herë pas here autorin, me kërkesën e tij;

- b). që autorit, me kërkesën e tij, në fazën përkatëse të procesit teknik të shumëzimit t'i mundësojë korrekturën;
- c). që, me rastin e përgatitjes së çdo botimi të ardhshëm të veprës, t'i mundësojë autorit futjen e ndryshimeve përkatëse, me kusht që kjo të mos e ndryshojë karakterin e veprës dhe që, duke pasur parasysh tërësinë e kontratës për botim të veprës, të mos paraqet shpërpjesëtim në pikëpamje të detyrimeve të botuesit.

#### **4. Detyrimi për kthimin e dorëshkrimit**

##### **Neni 92**

Dorëshkrimi ose ekzemplari tjetër origjinal që i është dorëzuar botuesit duhet patjetër t'i kthehet autorit, përveç artikujve, vizatimeve dhe kontributeve tjera në shtypin ditor dhe në atë periodik, nëse me kontratë nuk parashikohet ndryshe.

#### **5. E drejta e përparësisë së botuesit**

##### **Neni 93**

93.1. Botuesi i cili ka marrë të drejtën për botimin e veprës në formë të librit, ka të drejtën e përparësisë që, krahas ofertuesve tjerë të barabartë, ta botojë atë vepër në formë elektronike.

93.2. E drejta e përparësisë nga paragrafi paraprak zgjatë tre vjet që nga dita e kontraktimit të datës së botimit të veprës. Botuesi duhet të deklarohet në formë të shkruar brenda 30 ditësh që nga dita e marrjes së ofertës me shkrim nga autori.

#### **6. Shkatërrimi i ekzemplarëve të pa shitur**

##### **Neni 94**



Nëse botuesi synon që ekzemplarët e pa shitur të veprës t'i shesë si letër të vjetër, është i detyruar që blerjen paraprakisht t'ia ofrojë autorit, nëse rëndom është i arritshëm, sipas çmimit për letër të thjeshtë.

## **7. Shkatërrimi i veprës shkaku i forcës madhore**

### **Neni 95**

95.1. Nëse i vetmi ekzemplar ekzistues i veprës shkatërrohet nga shkaku i forcës madhore pasi t'i jetë dorëzuar botuesit, autori ka të drejtë në honorar, siç do t'i takonte po të ishte botuar vepra.

95.2. Nëse nga shkaku i forcës madhore është shkatërruar i tërë tirazhi i përgatitur i veprës, para se të jetë nxjerrë në treg, botuesi ka të drejtë të përgatisë botimin e ri, ndërsa autorit i takon honorari vetëm për botimin e shkatërruar.

95.3. Nëse nga shkaku i forcës madhore është shkatërruar një pjesë e tirazhit të veprës, para se të jetë nxjerrë në treg, botuesi ka të drejtë pa pagesë shtesë të honorarit të shumëzohet po aq ekzemplarë sa janë shkatërruar.

## **8. Përfundimi i kontratës**

### **Neni 96**

Kontrata e botimit përfundon:

- a). nëse autori vdes para përfundimit të veprës;
- b). nëse është shterur tirazhi i gjithë botimeve të miratuara;
- c). me skadimin e afatit të kohëzgjatjes së kontratës;
- d). me zgjidhjen e kontratës në përputhje me normat ligjore për detyrimet.

## **9. Zgjidhja e kontratës**

### **Neni 97**

97.1. Nëse botuesi nuk e boton veprën brenda afatit të kontraktuar ose brenda afatit nga pika (b) paragrafi (1) i nenit 90 të këtij ligji, autori ka të drejtë ta zgjidhë kontratën e botimit, të mbajë, përkatësisht të kërkojë pagesën e honorarit të caktuar, si dhe të kërkojë dëmshpërblimin.

97.2. Autori mund ta zgjidhë kontratën e botimit në rast se botuesi, pasi të jetë shitur tirazhi i botimit paraprak, ndërkaq kontrata përmban detyrimin për ribotime, nuk fillon të nxjerrë në treg ekzemplarët e botimit të ardhshëm brenda afatit nga pika (d) paragrafi (1) të nenit 90 të këtij ligji.

97.3. Botuesi mund të zgjidhë kontratën e botimit nëse autori nuk ia dorëzon dorëshkrimin ose një ekzemplar tjetër të veprës brenda afatit nga pika (a) paragrafi (1) të nenit 90 të këtij ligji.

97.4. Konsiderohet se tirazhi i botimit është shitur nëse numri i ekzemplarëve të pa shitur është më i vogël se 100.

## **2. KONTRATA E SHFAQJES DHE KONTRATA E INTERPRETIMIT**

### **Neni 98**

Me kontratën për shfaqjen, përkatësisht kontratën për interpretimin e veprës autori ia kalon shfrytëzuesit të drejtën për të shfaqur, përkatësisht për të interpretuar publikisht veprën e tij, ndërsa shfrytëzuesi merr detyrimin që atë vepër ta shfaqë, përkatësisht ta interpretojë publikisht në afatin e caktuar, në mënyrën dhe nën kushtet e përcaktuara me kontratë, dhe për këtë t'i paguajë autorit honorarin.

### **Neni 99**

Të drejtën e shfaqjes, përkatësisht të drejtën e interpretimit publik të veprës, autori mund ta kalojë njëkohësisht në disa persona, nëse me kontratë nuk parashikohet ndryshe.

#### **Neni 100**

Titullari i së drejtës në shfaqjen apo interpretimin publik të veprës teatrore, teatrore-muzikore dhe koreografike lidhë edhe kontratë për regjinë teatrore, koreografinë, skenografinë dhe kostumografinë.

#### **Neni 101**

Nëse autori nuk ia dorëzon shfrytëzuesit veprën (dorëshkrimin, partiturën etj.) brenda afatit të kontraktuar, shfrytëzuesi mund të zgjidhë kontratën dhe të kërkojë dëmshpërblim.

#### **Neni 102**

Dorëshkrimi, partitura ose origjinali tjetër i veprës që është objekt i kontratës i kthehen autorit, nëse me kontratë nuk parashikohet ndryshe.

#### **Neni 103**

Shfrytëzuesi detyrohet t'i mundësojë autorit përcjelljen dhe ecurinë e përgatitjeve për shfaqjen, përkatësisht interpretimin e veprës, të kujdeset për kushtet përkatëse teknike për shfaqjen, përkatësisht interpretimin e veprës, si dhe t'i dërgojë autorit ose përfaqësuesit të tij programin dhe herë pas here ta informojë për të ardhurat nga shfaqja, përkatësisht interpretimi i veprës.

#### **Neni 104**

Nëse shfrytëzuesi nuk e shfaq, përkatësisht nuk e interpreton veprën në afatin e kontraktuar, autori mund ta zgjidhë kontratën dhe të kërkojë dëmshpërblim, e pos kësaj mund të mbajë honorarin e paguar, respektivisht të kërkojë pagesën e honorarit të kontraktuar.

### **3. KONTRATA E PËRPUNIMIT TË VEPRËS**

## **Neni 105**

Me kontratën për përpunimin e veprës së autorit, autori e kalon të drejtën për t'u përpunuar vepra e tij në formën e përshtatjes skenike, përshtatjes audiovizuale ose për mënyra të tjera të shfrytëzimit të veprës në formë të ndryshuar.

## **4. KONTRATA E POROSISË SË VEPRËS SË AUTORIT**

## **Neni 106**

106.1. Me kontratën për porosi të veprës së autorit autori merr detyrimin që për porositësin të krijojë veprën e autorit dhe t'ia dorëzojë origjinalin ose ekzemplarën e veprës, ndërsa porositësi merr detyrimin që autorit t'ia paguajë honorarin.

106.2. Porositësi mund të mbikëqyrë procesin e krijimit të veprës dhe të japë udhëzime, por duke mos ndërhyrë në lirinë e shprehjes artistike apo shkencore të autorit.

106.3. Porositësi gëzon të drejtën e publikimit dhe të shpërndarjes së veprës, ndërsa autori ruan të drejtat tjera, nëse me kontratë nuk parashikohet ndryshe.

106.4. Porositësi i portretit mund ta reprodukojë portretin e bërë duke përfshirë edhe reprodukimin fotografik. Nëse portreti është vepër fotografike, lejohet reproduktimi jofotografik i tij.

106.5. Dispozitat e këtij neni zbatohen ngjashëm dhe atëherë sa i takon (mutatis mutandis) edhe ndaj veprës që autori e ka krijuar si fitues i konkursit publik.

106.6. Ndaj kontratës për porosi të veprës së autorit zbatohen dispozitat e përgjithshme të së drejtës së detyrimeve që kanë të bëjnë për kontratë për vepër, nëse në këtë ligj nuk parashikohet ndryshe.

## **5. KONTRATA E VEPRËS KOLEKTIVE TË AUTORIT**

### **Neni 107**

107.1. Vepra kolektive e autorit është vepër e krijuar në bashkëpunim të disa autorëve, duke gërshetuar kontributet e tyre veç e veç në një tërësi (p.sh. enciklopeditë, koleksionet, leksikonet, bazat e të dhënave, programet kompjuterike etj.), me iniciativën dhe nën drejtimin e një personi fizik a juridik si porositës i veprës.

107.2. Për krijimin e një vepre kolektive lidhet kontratë e veçantë. Nëse nuk janë plotësuar kushtet nga paragrafi paraprak (1) i këtij neni, kontrata e veprës kolektive është e pavlefshme.

107.3. Konsiderohet se porositësit i është bërë kalimi i pakufizuar dhe ekskluziv i të gjitha të drejtave ekonomike dhe i të drejtave tjera të autorit në veprën kolektive, nëse me kontratë nuk parashikohet ndryshe.

107.4. Porositësi i veprës kolektive të autorit gëzon të drejtën për ta publikuar dhe shfrytëzuar veprën nën emrin e vet, por në çdo ekzemplar të veprës duhet patjetër të jetë vënë lista e autorëve pjesëmarrës në krijimin e veprës kolektive.

## **Kapitulli 10**

### **DISPOZITA TË VEÇANTA PËR DISA VEPRA TË AUTORIT**

#### **I. VEPRA AUDIOVIZUELE**

##### **1. Përkufizimi**

### **Neni 108**

Vepër audiovizuale sipas këtij ligji janë: filmat kinematografik, televiziv dhe vizatimor, filmat e shkurtë videomuzikor, filmat reklamues, filmat dokumentar si dhe veprat e tjera audiovizuale, të shprehur në formë të vargut të pamjeve lëvizëse të ndërlidhura, të shoqëruara me zë a pa të, pavarësisht nga lloji i mbajtësit lëndor ku janë të fiksuara.

## **2. E drejta e përshtatjes audiovizuele**

### **Neni 109**

109.1. Me kontratë të përshtatjes audiovizuele të veprës së autorit, autori ia kalon producentit të filmit të drejtën ekskluzive të përpunimit të veprës së tij burimore, për ta xhiruar dhe shfrytëzuar si vepër audiovizuele.

109.2. Konsiderohet se autori i veprës burimore ia kalon ekskluzivisht dhe pa kufizime producentit të filmit të drejtën e përshtatjes së veprës burimore në vepër audiovizuele, të gjitha të drejtat ekonomike dhe të drejtat e tjera të autorit në atë vepër audiovizuele, përkthimet si dhe përshtatjet audiovizuele të saj, nëse me kontratë nuk parashikohet ndryshe.

109.3. Pavarësisht nga dispozitat e paragrafit paraprak autori i veprës burimore ruan:

- a). të drejtën ekskluzive për përpunim të mëtejshëm të veprës audiovizuele në një formë tjetër artistike.
- b). të drejtën ekskluzive për të lejuar një përshtatje të re audiovizuele të veprës burimore të tij, por pasi të kenë kaluar dhjetë vjet që nga dita e lidhjes së kontratës nga paragrafi (2) i këtij neni.
- c). të drejtën e kompensimit përkatës nga producenti i filmit, për çdo qiradhënie të videogrameve të veprës audiovizuele.

109.4. Autori i veprës burimore nuk mund të heqë dorë nga e drejta e tij sipas paragrafit paraprak

### **Neni 110**

Nëse një vepër burimore është punë e dy a më shumë bashkautorëve, dhe vetëm njëri prej tyre e ka dhënë të drejtën e përshtatjes audiovizuale, ndërsa bashkautori tjetër vetëm ka marrë pjesën e vet të pagesës së kompensimit, konsiderohet se edhe bashkautori tjetër e ka dhënë në heshtje të drejtën e tij.

#### **Neni 111**

Për kalimin e mëtejshëm të së drejtës së fituar për përshtatje nuk nevojitet autorizimi i autorit në rastet kur producenti i filmit nuk është në gjendje ta përfundojë me sukses veprën.

#### **Neni 112**

112.1. Nëse me kontratë nuk është parashikuar ndryshe, konsiderohet se producenti i filmit ka të drejtë që titullin e veprës së përshtatur ta përdorë për titull të veprës audiovizuale.

112.2. Autori i veprës burimore, nëse kërkon, ka të drejtë që emri i tij dhe njoftimi se vepra audiovizuale është bërë sipas veprës së tij, të shënohen në afishe, programe të kinemasë dhe mjete të tjera reklamuese.

#### **Neni 113**

Kontrata e përshtatjes audiovizuale mund të përmbajë klauzolën mbi atë se autori i veprës burimore ka të drejtë ta shikojë skenarin para fillimit të produksionit.

### **3. Bashkautorët e veprës audiovizuale**

#### **Neni 114**

114.1. Vepra audiovizuale është tërësi e mëvetësishme e kontributeve krijuese të bashkautorëve që kanë bashkëpunuar në bërjen e saj, si dhe vepër në të cilën mishërohen kontributet e autorëve të tjerë, por që nuk konsiderohen si bashkautorë.

114.2. Bashkautorë të veprës audiovizuale konsiderohen: autori i përshtatjes, autori i skenarit, autori i dialogëve, drejtori i fotografisë dhe regjisori kryesor.

114.3. Nëse muzika është kompozuar enkas për atë vepër, bashkautor i veprës është edhe kompozitori.

114.4. Nëse animacioni përbën element thelbësor të veprës audiovizuale, bashkautor i kësaj vepre konsiderohet edhe animatori kryesor.

114.5. Kompozitori i muzikës dhe animatori, përkatësisht vizatuesi që nuk konsiderohen bashkautorë të veprës sipas paragrafit (3) dhe (4) të këtij neni, si dhe skenografi, kostumografi, piktori i grimit dhe montazhisti, konsiderohen autorë të kontributeve përkatëse në veprën e autorit.

#### **4. Kontrata e prodhimit të filmit**

##### **Neni 115**

115.1. Marrëdhëniet e ndërsjella të producentit të filmit me autorët e veprës audiovizuale dhe autorët e kontributeve, si dhe marrëdhëniet midis vetë bashkautorëve rregullohen me anë të kontratës për prodhim të filmit.

115.2. Me kontratën e prodhimit të filmit autorët e veprës audiovizuale dhe autorët e kontributeve marrin përsipër detyrimin ndaj producentit të filmit për të bashkëpunuar në mënyrë krijuese në krijimin e veprës audiovizuale, dhe ia kalojnë të gjitha të drejtat e tyre ekonomike mbi atë vepër, ndërkaj producenti i filmit merr përsipër detyrimin për t'iu paguar honorarin e autorit.

115.3. Me lidhjen e kontratës për prodhimin e filmit, konsiderohet se bashkautorët dhe autorët e kontributeve, në mënyrë ekskluzive dhe pa kufizime, ia kalojnë producentit të filmit të gjitha të drejtat ekonomike dhe të drejtat tjera të autorit mbi veprën audiovizuale, përkthimet e saja në gjuhë të tjera dhe përpunimet e tjera audiovizuale si dhe fotografitë që kanë të bëjnë me veprën, nëse me kontratë nuk është parashikuar ndryshe.



115.4. Pavarësisht nga dispozitat e paragrafit paraprak:

- a). Bashkautorët ruajnë të drejtën ekskluzive deri në përpunimin e mëtejshëm të veprës audiovizuale në një formë tjetër artistike;
- b). autorët e kontributeve e ruajnë të drejtën ekskluzive që kontributet e tyre në veprën audiovizuale, pas përfundimit të veprës, t'i shfrytëzojnë ndaras nga vepra audiovizuale, nëse me këtë nuk do të cenonin të drejtat e producentit të filmit;
- c). bashkautorët dhe autorët e kontributeve ruajnë të drejtën e kompensimit përkatës nga producenti i filmit, për çdo qiradhënie të videogrameve të veprës audiovizuale.

115.5. Bashkautorët dhe autorët e kontributeve nuk mund të heqin dorë nga të drejtat sipas paragrafit paraprak (4) të këtij neni.

## **5. Honorari i autorit**

### **Neni 116**

116.1. Bashkautorëve të veprës audiovizuale u takon honorari i autorit ndaras për secilën të drejtë ekonomike, apo të drejtë tjetër të autorit që ia kanë kaluar producentit të filmit.

116.2. Producenti i filmit detyrohet që, të paktën një herë në vit, t'i informojë bashkautorët e veprës audiovizuale lidhur me të ardhurat e realizuara për secilën formë të autorizuar të shfrytëzimit të veprës, si dhe t'u mundësojë të njihen me të dhënat që u referohen të ardhurave.

## **6. Përfundimi i veprës audiovizuale**

### **Neni 117**

117.1. Vepra audiovizuale konsiderohet e përfunduar kur mes regjisorit kryesor dhe producentit të filmit arrihet pëlqimi se kopja e parë standarde (versioni përfundimtar) është e përfunduar.

117.2. Çfarëdo ndryshimi i kopjes së parë standarde nga paragrafi paraprak nuk lejohet të bëhet pa pëlqimin e arritur ndërmjet regjisorit kryesor dhe producentit të filmit.

117.3. Nuk lejohet shkatërrimi i kopjes së parë standarde të veprës audiovizuale.

117.4. Po qe se një nga bashkautorët apo autorët e kontributeve nuk dëshiron përfundimin e plotë të kontributit të vet në veprën audiovizuale ose kur nuk ka mundësi për të vazhduar bashkëpunimin, nuk mund ta kundërshtojë shfrytëzimin e kontributit të tij të deriatëhershëm për qëllim të përfundimit të plotë të veprës. Në rast të këtillë, autori gëzon të drejtat lidhur me kontributin e tij të deriatëhershëm.

## **7. Zgjidhja e kontratës**

### **Neni 118**

118.1. Nëse producenti i filmit nuk ka arritur ta përfundojë veprën audiovizuale për tre vjet, që nga dita e lidhjes së kontratës për veprën filmike, bashkautorët kanë të drejtë të zgjidhin kontratën, nëse me kontratë nuk parashikohet ndryshe.

118.2. Përveç të drejtës për zgjidhjen e kontratës, bashkautorët e veprës audiovizuale kanë të drejtë në dëmshpërblim, nëse producenti i filmit nuk fillon shfrytëzimin e veprës së përfunduar audiovizuale brenda një viti që nga dita e përfundimit të kopjes së parë standarde, nëse me kontratë nuk parashikohet ndryshe.

118.3. Në rastet nga paragrafët e mësipërm (1) dhe (2) të këtij neni, bashkautorët dhe autorët e kontributeve mbajnë të drejtën e pagesës së honorarit.

## **8. Të drejtat mbi fotografitë**

### **Neni 119**

Me lidhjen e kontratës për prodhimin e filmit konsiderohet se drejtori i fotografisë ia ka kaluar producentit të filmit të gjitha të drejtat e shfrytëzimit të fotografive që janë bërë gjatë prodhimit të veprës audiovizuale.

## **9. Kufizimi i të drejtave**

### **Neni 120**

Autori i veprës burimore, i cili ka kaluar të drejtën për përshtatje audiovizuale, si dhe bashkautorët e veprës audiovizuale dhe autorët e kontributeve në veprën audiovizuale nuk gëzojnë të drejtën e pendimit (neni 20) si dhe të drejtën e revokimit të të drejtave ekonomike (neni 88).

## **II. PROGRAMET KOMPJUTERIKE**

### **1. Përkufizimi**

#### **Neni 121**

121.1. Programet kompjuterike, sipas këtij ligji, janë programet e shprehura në çfarëdo forme, duke përfshirë edhe materialin e disenjuar të përgatitur për krijimin e tyre.

121.2. Nuk gëzojnë mbrojtje idetë dhe parimet që përbëjnë bazën e cilitdo element të programit, duke përfshirë edhe ato që përbëjnë bazën e ndërfaqes.

### **2. Të drejtat e autorit të programit kompjuterik të krijuar në kuadër**

**të marrëdhënies së punës ose sipas porosisë**

#### **Neni 122**

Nëse autori ka bërë program kompjuterik duke përbushur detyrat e tij të punës ose sipas udhëzimeve të punëdhënësit të tij, përkatësisht nëse autori ka bërë program kompjuterik në bazë të kontratës për porosi të veprës, konsiderohet se të gjitha të drejtat ekonomike dhe të drejtat e tjera të autorit mbi atë program kompjuteri i janë kaluar ekskluzivisht dhe pa kufizime punëdhënësit, përkatësisht porositësit të programit, nëse me kontratë nuk parashikohet ndryshe.

### **3. Të drejtat e autorit**

#### **Neni 123**

123.1. Autori i programit kompjuterik ka të drejtë ekskluzive të lejojë apo ta ndalojë, sidomos:

- a). Reprodukimin e pjesëve përbërëse apo të programit kompjuterik në tërësi, me çfarëdo mjeti apo në çfarëdo forme, pa marrë parasysh a është i përkohshëm apo përhershëm. Në rast se vendosja, ekspozimi, vënia në punë, transmetimi ose deponimi i programit kërkon reprodukimin e tij, për të kryer këto veprime duhet patjetër leja e autorit;
- b). përkthimin, përshtatjen, rregullimin ose ndonjë përpunim tjetër të programit kompjuterik, si dhe reprodukimin e rezultateve të ndryshimeve të tilla, por pa prekur të drejtat e personit i cili ka bërë ato ndryshime;
- c). shpërndarjen e origjinalit të programit kompjuterik ose të ekzemplarëve të tij në çfarëdo forme, duke përfshirë edhe qiradhënien.

123.2. Autori mundet, gjithashtu, të kalojë të drejtat nga paragrafi paraprak në personat e tretë edhe me kontratë për dhënien e licencës.

### **4. Kufizimet e të drejtave të autorit**

#### **Neni 124**

124.1. Nëse me kontratë nuk përcaktohet ndryshe, zotëruesi i ligjshëm i programit kompjuterik, pa autorizimin e autorit mund t'i kryejë veprimet nën pikat (a) dhe (b) paragrafi 1 të nenit 123 të këtij ligji, duke përfshirë edhe korrigjimin e gabimeve, por në masën që është e domosdoshme për shfrytëzimin e programit kompjuterik në përputhje me qëllimin e tij.

124.2. Personi që gëzon të drejtën për të shfrytëzuar programin kompjuterik, pa autorizimin e autorit mund të bëjë deri dy kopje rezervë të programit kompjuterik, nëse kjo është e nevojshme për shfrytëzimin e tij.

124.3. Personi që gëzon të drejtën për të shfrytëzuar kopjen e programit kompjuterik, pa autorizimin e autorit, mund të vëzhgojë, studiojë ose të provojë funksionimin e programit kompjuterik, për të forcuar idetë dhe parimet që janë themel i cilitdo element të programit kompjuterik, nëse këtë e bën gjatë veprimit të vendosjes, ekspozimit, vënies në punë, transmetimit ose deponimit të programit për të cilin ka autorizim.

124.4. Ndaj programeve kompjuterike nuk zbatohen dispozitat lidhur me të drejtën e pendimit (neni 20), të drejtën e kompensimit të veçantë (neni 39) dhe të drejtën për reprodukim privat ose tjetër vetjak (neni 45).

124.5. Përcaktimet kontraktore që janë në kundërshtim me dispozitat nga paragrafi (2) dhe (3) të këtij neni janë të pavlefshme.

## **5. Zbërthimi**

### **Neni 125**

125.1. Nuk është e domosdoshme leja e autorit, në kuptim të pikave (a) dhe (b) paragrafi 1 të nenit 123 të këtij ligji, për të bërë reprodukimin e kodit apo përkthimin e formave të tij, kur reproduktimi apo përkthimi i tillë është i domosdoshëm për të nxjerrë të dhënat për arritjen e ndërveprimit të programit kompjuterik të krijuar në mënyrë të pavarur, me programet e tjera ose mekanizmin e kompjuterit ("hardware"), nëse plotësohen kushtet në vijim:

- a). që këto veprime të bëhen nga zotëruesi i licencës ose shfrytëzuesi tjetër i autorizuar ose, në emër të tyre, nga një person tjetër;
- b). që informacioni i nevojshëm për ndërveprim nuk ka qenë më parë i kapshëm në mënyrë të lehtë për personat nga pika paraprake (a) paragrafi 1 të këtij neni;

- c). që këto veprime të kufizohen vetëm në ato pjesë të programit ekzistues që janë të domosdoshme për arritjen e ndërveprimit.

125.2. Është e ndaluar që informacionet e nxjerra me veprimet nga paragrafi paraparak (1) i këtij neni:

- a). të përdoren për qëllime të tjera, përveç për arritjen e ndërveprimit të programit kompjuterik të krijuar në mënyrë të pavarur;
- b). t'iu jepen personave të tjerë, përveç kur kjo është e domosdoshme për arritjen e ndërveprimit të programit kompjuterik të krijuar në mënyrë të pavarur;
- c). të përdoren për krijimin, prodhimin ose nxjerrjen në treg të programit tjetër kompjuterik, i cili për nga shprehja e tij është thelbësisht i ngjashëm, ose për çfarëdo veprimi me të cilin cenohet e drejta e autorit.

125.3. Dispozitat nga paragrafi (1) i këtij neni nuk mund të interpretohen në atë mënyrë që do të lejojnë zbatimin e tyre në kundërshtim me përdorimin normal të programit kompjuterik ose duke cenuar të drejtat e ligjshme të autorit.

125.4. Përcaktimet kontraktore që janë në kundërshtim me dispozitat e këtij neni janë të pavlefshme.

## **6. Masa të veçanta të mbrojtjes**

### **Neni 126**

Cenim i së drejtës së autorit mbi programin kompjuterik konsiderohet po ashtu:

- a). çdo shpërndarje, duke përfshirë edhe ofertën për shfrytëzimin e një a më shumë ekzemplarëve të programit kompjuterik, për të cilin dihet ose do të mund të dihej se është ekzemplar i paligjshëm.

- b). zotërimi për qëllime komerciale i ekzemplarit të programit kompjuterik, për të cilin dihet ose do të mund të dihej se është ekzemplar i paligjshëm.

## **7. Zbatimi i dispozitave të tjera ligjore**

### **Neni 127**

Dispozitat e këtij ligji lidhur me programet kompjuterike nuk prekin dispozitat e tjera ligjore lidhur me programet kompjuterike, siç janë ato për patentën, markën e prodhimit, mbrojtjen e gjysmëpërçuesve, mbrojtjen nga konkurrenca jolojale, sekretin zyrtar, si dhe së drejtës së detyrimeve.

## **III. VEPRA E AUTORIT NGA MARRËDHËNIA E PUNËS**

### **Neni 128**

128.1. Kur vepra e autorit krijohet nga i punësuar i gjatë marrëdhënies së punës, duke përbushur detyrat e veta të punës ose sipas udhëzimeve të punëdhënësit, konsiderohet se të drejtat ekonomike dhe të drejtat tjera të autorit i janë kaluar ekskluzivisht dhe pa kufizime punëdhënësit, për një periudhë dhjetëvjeçare që nga përfundimi i veprës, nëse me kontratën e punësimit a me një akt tjetër të shkruar me punëdhënësin nuk është parashikuar ndryshe.

128.2. Pavarësisht nga dispozitat e paragrafit paraprak (1) të këtij neni, të drejtat do t'i kthehen autorit të punësuar para mbarimit të afatit të tillë, në rast të vdekjes së punëdhënësit, përkatësisht në rast të likuidimit të punëdhënësit si person juridik.

128.3. Nëse punëdhënësi fare nuk i shfrytëzon të drejtat ekonomike mbi atë vepër, ose i shfrytëzon në masë të papërfillshme, autori i punësuar ka të drejtë të kërkojë nga punëdhënësi që ky t'ia kalojë ato të drejta, kundrejt kompensimit të shpenzimeve.

128.4. Nëse nuk është kontraktuar ndryshe në mes autorit dhe punëdhënësit, i punësuar si autor i veprës gëzon të drejtën të kërkojë nga punëdhënësi kompensim shtesë, nëse paga e tij është në shpërpjesëtim të dukshëm me fitimet apo kursimet e realizuara në saje të shfrytëzimit të veprës.

#### **Neni 129**

Pavarësisht nga dispozitat e nenit paraparak 128 të këtij ligji, autori i veprës ruan të drejtën ekskluzive për të përfshirë veprën e vet në koleksion të veprave të zgjedhura të tij ose në koleksion të të gjitha veprave të tij.

#### **Neni 130**

Të drejtat ekonomike dhe të drejtat e tjera të autorit që kanë të bëjnë me bazën e të dhënave ose me veprën kolektive të krijuar gjatë marrëdhënies së punës, konsiderohen se i janë kaluar punëdhënësit ekskluzivisht dhe pa kufizime, nëse me kontratë nuk parashikohet ndryshe. Dispozitat e paragrafit (4) të nenit 107 të këtij ligji zbatohen edhe në kesi rasti.

### **IV. VEPRAT E KRIJUARA GJATË SHKOLLIMIT**

#### **Neni 131**

Institucionet arsimore kanë të drejtë që vepra të plota të autorëve ose pjesë të veprave të nxënësve apo studentëve të vet t'i përfshijnë në koleksione veprash shkollore të nxënësve apo studentëve të vet, si dhe këto koleksione t'i reprodukojnë dhe shpërndajnë.

### **PJESA III**



## **TË DREJTAT E AFËRTA**

### **Kapitulli 1**

## **TË DREJTAT E INTERPRETUESVE**

### **1. Interpretuesit**

#### **Neni 132**

132.1. Interpretues janë aktorët, këngëtarët, muzikantët, vallëzuesit dhe personat e tjerë që me anë të aktrimit, këndimit, gjuhës së gjesteve a të lëvizjeve, recitimit apo ndonjë mënyrë tjetër, interpretojnë ndonjë vepër të autorit ose shprehje të folklorit.

132.2. Interpretues nga paragrafi paraprak konsiderohen edhe regjisori i shfaqjes teatrale, dirigjenti i orkestrës, dirigjenti i korit, mjeshtri i tonit si dhe artistët e cirkut e të varietesë.

### **2. Të drejtat morale të interpretuesve**

#### **Neni 133**

133.1. Interpretuesit kanë të drejtë ekskluzive:

- a). që emri, pseudonimi apo shenja e tyre të tregohet me rastin e shfrytëzimit të interpretimit të tyre;
- b). të kundërshtojnë çdo deformim, shëmtim apo shfrytëzim të interpretimit që mund të cenojë nderin dhe famën e tyre.

133.2. Nëse interpretimin e bën ansambli i interpretuesve, të drejtën nga pika (1) e paragrafi paraprak e mban ansambli si tërësi, solistët dhe udhëheqësi artistik.

133.3. Me rastin e vlerësimit nëse me një formë konkrete të shfrytëzimit cenohen nderi dhe respekti i interpretuesit merret parasysh masa e arsyeshme e ndjeshmërisë së interpretuesit.

### **3. Të drejtat ekonomike të interpretuesve**

#### **Neni 134**

Interpretuesi ka të drejtë të lejojë apo të ndalojë:

- a). fiksimin e interpretimit të tij drejtpërdrejt;
- b). reprodukimin e interpretimit të tij në fonograme dhe videograme;
- c). shpërndarjen e fonogrameve dhe të videogrameve që përmbajnë interpretimin e tij;
- d). qiradhënien e fonogramit ose të videogramit që përmban interpretimin e tij;
- e). emetimin radioteleviziv të interpretimit të tij në të gjallë;
- f). transmetimin publik të interpretimit të tij në të gjallë;
- g). përpunimin e interpretimit të tij tashmë të fiksuar;
- h). vënien e interpretimit të tij në dispozicion publikut.

### **4. E drejta e kompensimit**

#### **Neni 135**

135.1. Interpretuesit kanë të drejtën e hises në kompensimin që merr prodhuesi i fonogramit, për komunikimin publik të interpretimit të tyre nga fonogrami i botuar për qëllime komerciale.

135.2. Interpretuesit që ia kalojnë të drejtën e qiradhënies prodhuesit të fonogramit ose producentit të filmit ruajnë të drejtën e kompensimit përkatës nga qiradhënia. Interpretuesit nuk mund të heqin dorë nga kjo e drejtë.

135.3. Interpretuesi ka të drejtën e hises në kompensim të veçantë nga paragrafi (2) i nenit 39 të këtij ligji.

## **5. Supozimi i kalimit**

### **Neni 136**

136.1. Me lidhjen e kontratës për prodhimin e filmit presumohet se interpretuesi ekskluzivisht dhe pa kufizime ia ka kaluar producentit të filmit të gjitha të drejtat e veta ekonomike lidhur me interpretimin, nëse me kontratë nuk parashikohet ndryshe.

136.2. Për secilën të drejtë ekonomike që do ta ketë kaluar sipas paragrafit paraprak, interpretuesi ka të drejtë të kompensimit përkatës nga ana e producentit të filmit.

## **6. Përfundimi i veprës audiovizuele**

### **Neni 137**

Nëse interpretuesi refuzon përfundimin e kontributit të vet për veprën audiovizuele ose nuk ka mundësi ta përfundojë atë, nuk mund të kundërshtojë që kontributi i tij tashmë i dhënë të shfrytëzohet për përfundimin e plotë të veprës. Interpretuesi gëzon të drejtat përkatëse për kontributin e deriatëhershëm.

## **7. Përfaqësuesi i ansamblit të interpretuesve**

## **Neni 138**

138.1. Lidhur me administrimin e të drejtave të interpretatorëve ansamblin e përfaqëson personi që është i autorizuar me shkrim nga shumica e anëtarëve të ansamblit.

138.2. Nëse në interpretim të veprës, pos ansamblit, marrin pjesë dirigjenti, solistë dhe bartësit e roleve kryesore, të cilët nuk janë njëkohësisht anëtarë të ansamblit, për administrimin e të drejtave nga ky ligj është i domosdoshëm pajtimi i të gjithë këtyre personave, nëse në kontratë midis tyre dhe ansamblit nuk parashikohet ndryshe.

138.3. Dispozitat e paragrafëve të mësipërm të këtij neni nuk kanë të bëjnë me dirigjentët, solistët dhe regjisorët e shfaqjeve teatrore.

## **8. Interpretimet nga marrëdhënia e punës**

### **Neni 139**

Në lidhje me interpretimet që janë rezultat i përmbushjes së detyrave të punës ose udhëzimeve të punëdhënësit gjatë kohëzgjatjes së punësimit, ngjashëm dhe sa u takon (*mutatis mutandis*) zbatohen dispozitat e këtij ligji, që u referohen veprave të autorit të krijuara gjatë marrëdhënies së punës.

## **9. Kohëzgjatja e mbrojtjes**

### **Neni 140**

140.1. Të drejtat ekonomike të interpretuesit zgjasin 50 vjet që nga interpretimi i bërë. Nëse interpretimi i fiksuar brenda kësaj periudhe është botuar në mënyrë të ligjshme ose i është komunikuar publikut, të drejtat e interpretuesit zgjasin 50 vjet që nga dita e botimit të parë ose i komunikimit të parë të tillë, varësisht se cili veprim është bërë më përpara.

140.2. Të drejtat morale të interpretuesit zgjasin pa kufizime kohore.

## **Kapitulli 2**

### **TË DREJTAT E PRODHUESVE TË FONOGRAMEVE**

#### **1. Përkufizimi**

##### **Neni 141**

141.1. Prodhuesi i fonogramit është personi fizik apo juridik i cili me iniciativën dhe përgjegjësinë e vet bën i pari fiksimin e tingujve të ndonjë interpretimi ose të tingujve të tjerë si dhe shprehjeve tjera zanore. Konsiderohet se është prodhues i fonogramit të caktuar personi, emri i të cilit, firma, pseudonimi apo marka është e shënuar në mënyrë të zakonshme si e tillë në fonogram ose është treguar me rastin e publikimit të fonogramit, derisa nuk provohet ndryshe.

141.2. Fiksimi është ngulitja e tingujve ose e shprehjeve zanore në mbartës nga i cili mund të dëgjohen, riprodhohen ose komunikohen përmes ndonjë pajisjeje.

#### **2. Të drejtat e prodhuesve të fonogrameve**

##### **Neni 142**

Prodhuesit e fonogrameve kanë të drejtë ekskluzive të lejojnë apo të ndalojnë:

- a). reprodukimin e fonogrameve të veta;
- b). shpërndarjen e fonogrameve të veta;
- c). qiradhënien e fonogrameve të veta;
- d). vënien e fonogrameve të veta në dispozicion të publikut;
- e). përpunimin e fonogrameve të veta.

### **3. E drejta e kompensimit për komunikimin e fonogrameve publikut**

#### **Neni 143**

143.1. Prodhuesi i fonogramit gëzon të drejtën e kompensimit për komunikim publikut të fonogramit të tij të botuar për qëllime komerciale.

143.2. Nëse me kontratë mes prodhuesit të fonogramit dhe interpretuesve nuk është parashikuar ndryshe, prodhuesi i fonogramit është i detyruar që gjysmën e kompensimit nga paragrafi paraparak t'ua përcjellë interpretuesve, interpretimet e të cilëve gjenden në fonogramin e tij.

143.3. Në kuptim të këtij neni, fonograme të botuara për qëllime komerciale konsiderohen fonogramet e vëna në dispozicion të publikut.

### **4. E drejta në kompensim të veçantë**

#### **Neni 144**

Prodhuesit e fonogrameve kanë të drejtën e hisesë në kompensimin e veçantë nga paragrafi (1) i nenit 39 të këtij ligji.

### **5. Kohëzgjatja e të drejtave**

#### **Neni 145**

Të drejtat e prodhuesit të fonogrameve zgjasin 50 vjet që nga koha e fiksimit. Nëse brenda kësaj kohe fonogrami është botuar ligjshëm, të drejtat zgjasin 50 vjet që nga botimi i tij i parë. Nëse gjatë kësaj periudhe fonogrami nuk është botuar ligjshëm, por i është komunikuar ligjshëm publikut, të drejtat zgjasin 50 vjet që nga dita e komunikimit të parë të ligjshëm për publikun.

### **Kapitulli 3**

## **TË DREJTAT E PRODUCENTËVE TË FILMIT**

### **1. Përkufizimi**

#### **Neni 146**

146.1. Producent i filmit është personi fizik a juridik i cili, me iniciativën dhe nën përgjegjësinë e vet, e fikson i pari një vepër audiovizuale në videogram. Konsiderohet se producent i filmit është personi, emri i të cilit, firma ose marka, në mënyrë të zakonshme është shënuar në videogram si i tillë ose është treguar me rastin e publikimit të videogramit, derisa nuk provohet ndryshe.

### **2. Të drejtat e producentëve të filmit**

#### **Neni 147**

Producentët e filmit kanë të drejtë ekskluzive të lejojnë apo të ndalojnë:

- a). reprodukimin e videogrameve të veta;
- b). shpërndarjen e videogrameve të veta;
- c). qiradhënien e videogrameve të veta;
- d). shfaqjen publike të videogrameve të tyre;
- e). vënien e videogrameve të veta në dispozicion të publikut.

### **3. E drejta e kompensimit të veçantë**

#### **Neni 148**

Producentët e filmit gëzojnë të drejtën e hisesë në kompensim të veçantë nga paragrafi (2) i nenit 39 të këtij ligji.

### **4. Kohëzgjatja e të drejtave**

#### **Neni 149**

Të drejtat e producentëve të filmit zgjasin 50 vjet që nga fiksimi i parë i videogramit. Nëse gjatë kësaj periudhe videogrami është botuar ose i është komunikuar ligjshëm publikut, të drejtat e producentit të filmit zgjasin 50 vjet që nga dita e botimit të parë ose e komunikimit të parë publikut, varësisht se cili veprim është bërë më përpara.

## **Kapitulli 4**

### **TË DREJTAT E TRANSMETUESVE**

#### **1. Të drejtat e Transmetuesit**

#### **Neni 150**

Transmetuesi ka të drejtë ekskluzive të lejojë apo të ndalojë:



- a) fiksimin e emisioneve të veta;
- b) reprodukimin e emisioneve të veta të fiksuara;
- c) riemetimin radioteleviziv të emisioneve të veta;
- d) emetimin e mëtejshëm të emisioneve të veta, kur kjo bëhet në ato vende ku hyrja e publikut është me pagesë;
- e) vënien në dispozicion publikut të emisioneve të veta të fiksuara.

### **3. Kohëzgjatja e të drejtave**

#### **Neni 151**

Të drejtat e Transmetuesit zgjasin 50 vjet që nga dita e emetimit të parë radioteleviziv të emisionit të tyre.

### **Kapitulli 5**

#### **TË DREJTAT E PRODHUESVE TË BAZAVE TË TË DHËNAVE**

##### **1. Përkufizimi**

#### **Neni 152**

153.1. Baza e të dhënave është koleksion i veprave të mëvetësishme, të të dhënave dhe materialeve tjera të çfarëdo forme, të rregulluara në mënyrë sistematike ose metodike që kanë qasje veç e veç nëpërmjet mjeteve elektronike apo mjeteve tjera, me ç'rast marrja, verifikimi apo paraqitja e përmbajtjeve të saja nga ana kualitative dhe /ose kuantitative kërkon investim thelbësor.

153.2. Prodhues i bazës së të dhënave është personi fizik a juridik i cili me iniciativën dhe nën përgjegjësinë e vet bën i pari investim thelbësor në kuptim të paragrafit paraprak. Konsiderohet se prodhues i bazës së caktuar të të dhënave është personi, emri i të cilit, firma, pseudonimi apo marka është shënuar në mënyrë të zakonshme në atë bazë të dhënash ose është treguar me rastin e publikimit të asaj baze, derisa nuk provohet ndryshe.

153.3. Mbrojtja e bazës së të dhënave apo e përmbajtjeve të saja zbatohet pavarësisht nga mbrojtja autor-juridike ose mbrojtja tjetër juridike. Të drejtat që ekzistojnë lidhur me materialin e ngërthyer në bazën e të dhënave dhe të shfrytëzimit të tij mbeten të paprekshme.

## **2. Objekti i mbrojtjes**

### **Neni 153**

154.1. Mbrojtja e bazës së të dhënave në kuptim të këtij kapitulli zbatohet:

- a). ndaj tërë përmbajtjes së bazës së të dhënave;
- b). ndaj çdo pjese thelbësore kualitative dhe /ose kuantitative të përmbajtjes së saj;
- c). ndaj pjesëve jothelbësore kualitative dhe / ose sasiore të përmbajtjes së saj, kur ato përdoren në mënyrë të përsëritur dhe sistematike, për çka bie ndesh me shfrytëzimin normal të kësaj baze të të dhënave ose me këtë preken së tepërmi interesat ekzistuese të ligjshme të prodhuesit të bazës së të dhënave.

154.2. Në kuptim të këtij kapitulli, mbrojtja nuk përfshin programet kompjuterike të përdorura për bërjen ose funksionimin e bazës elektronike të të dhënave.

## **3. Të drejtat e prodhuesve të bazave të të dhënave**

### **Neni 154**

Prodhuesi i bazës së të dhënave ka të drejtë ekskluzive të lejojë apo ndalojë:

- a). reprodukimin e bazës së tij të të dhënave;
- b). shpërndarjen e bazës së tij të të dhënave;
- c). qiradhënien e bazës së tij të të dhënave;
- d). vënien e bazës së tij të të dhënave në dispozicion të publikut;
- e). çfarëdo formë tjetër të komunikimit të bazës së vet të të dhënave për publikun.

#### **4. Të drejtat dhe detyrimet e shfrytëzuesve të ligjshëm**

##### **Neni 155**

156.1. Shfrytëzuesi i ligjshëm i bazës së publikuar të të dhënave ose të ekzemplarit të saj, mund të shfrytëzojë lirshëm në mënyrë kualitative dhe / ose kuantitative pjesët jothelbësore të përmbajtjeve të saj, për çfarëdo qëllimi. Në rast se shfrytëzuesi është i autorizuar të përdorë vetëm një pjesë të caktuar të bazës së të dhënave, dispozitat e këtij neni do të zbatohen vetëm për atë pjesë.

156.2. Shfrytëzuesi i ligjshëm i bazës së publikuar të të dhënave ose i ekzemplarit të saj nuk mund të bëjë veprime që janë në kundërshtim me shfrytëzimin normal të asaj baze të të dhënash ose me çka pa arsye preken të drejtat e prodhuesit të asaj baze të të dhënave.

156.3. Shfrytëzuesi i ligjshëm i bazës së publikuar të të dhënave ose i ekzemplarit të saj nuk mund të cenojë të drejtën e autorit ose të drejtat e afërta për veprat ose lëndët e ngërthyera në atë bazë të dhënash.

156.4. Çdo përcaktim kontraktor në kundërshtim me këtë nen është i pavlefshëm.

#### **5. Punësimi dhe kontrata e porosisë**

## **Neni 156**

Kur baza e të dhënave është bërë nga personi i punësuar duke përmbushur detyrat e tij të punës ose sipas udhëzimeve të punëdhënësit, ose kur është bërë në bazë kontratës së porosisë, prezumohet se të gjitha të drejtat mbi atë bazë të të dhënave i janë kaluar ekskluzivisht dhe pa kufizime punëdhënësit, përkatësisht porositësit, nëse në këtë ligj a me kontratë nuk parashikohet ndryshe.

## **6. Kufizimet e të drejtave**

### **Neni 157**

Shfrytëzuesi i ligjshëm i bazës së publikuar të të dhënave mund të përdorë lirshëm pjesë thelbësore të përmbajtjes së saj:

- a). për përdorim privat ose tjetër vetjak, nëse ka të bëjë me bazë joelektronike të të dhënave;
- b). për përdorim nga nevojat e ilustrimit të mësimdhënies ose hulumtimeve shkencore, me kusht që të tregohet burimi dhe në masën e përligjur për qëllimin jokomercial;
- c). për nevojat e sigurimit publik ose për të siguruar ecurinë e drejtë të veprimeve dhe raportimeve në procedurat administrative, parlamentare dhe gjyqësore.

## **7. Kohëzgjatja e mbrojtjes**

### **Neni 158**

158.1. Të drejtat e prodhuesit të bazës së të dhënave zgjasin 15 vjet që nga bërja e plotë e saj. Nëse baza e të dhënave është publikuar në mënyrë të ligjshme gjatë kësaj periudhe, të drejtat zgjasin 15 vjet që nga publikimi i parë e saj.

158.2. Çdo ndryshim thelbësor kualitativ dhe/ose kuantitativ i përmbajtjes së bazës së të dhënave që rezulton me investim të ri thelbësor kualitativ dhe /ose kuantitativ do ta kualifikojë atë bazë të dhënash me kohëzgjatje të re të mbrojtjes. Si ndryshim thelbësor i përmbajtjes konsiderohen edhe shtojcat e njëpasnjëshme, fshirjet ose ndryshimet e tjera të bazës së të dhënave.

## **Kapitulli 6**

### **TË DREJTAT E BOTUESVE**

#### **1. E drejta e hisës për kompensim të veçantë**

##### **Neni 159**

159.1. Botuesit kanë të drejtën e hisës në kompensim të veçantë nga neni 39 paragrafi (3) i këtij ligji.

159.2. E drejta nga paragrafi paraprak zgjatë 50 vjet që nga botimi i ligjshëm i veprës.

#### **2. Veprat e pa publikuara në domenin publik**

##### **Neni 160**

160.1. Personi që për herë të parë boton në mënyrë të ligjshme ose i komunikon publikut veprën ende të pa publikuar dhe e cila bie në domenin publik gëzon mbrojtje të njëjtë siç është për të drejtat ekonomike dhe të drejtat e tjera të autorit.

160.2. Të drejtat në kuptimin e paragrafit paraprak zgjasin 25 vjet që nga botimi i parë i ligjshëm, përkatësisht komunikimi i veprës për publikun.

#### **3. Botimet shkencore**

## **Neni 161**

161.1. Botimet që përbëhen nga vepra dhe tekste për të cilat ka mbaruar mbrojtja gëzojnë mbrojtje të njëjtë siç është për të drejtat ekonomike dhe të drejtat e tjera të autorit, nëse janë rezultat i përpjekjeve shkencore dhe dallohen dukshëm nga botimet e njohura paraprake të këtyre veprave (përmes rimës, thyerjes dhe karakteristikave tjera redaktuese).

161.2. Të drejtat në kuptimin e paragrafit paraprak zgjasin 30 vjet që nga botimi i parë i ligjshëm i veprës.

## **PJESA IV**

### **ADMINISTRIMI DHE MENAXHIMI I TË DREJTAVE**

#### **Kapitulli 1**

##### **Dispozitat e përgjithshme**

## **Neni 162**

162.1. Autori mund të ushtrojë të drejtat e tij personalisht apo përmes agjentit.

162.2. Të drejtat e autorit mund të ushtrohen përmes administrimit dhe/ose menaxhimit.

162.3. Të drejtat e autorit mund të menaxhohen individualisht, ndarazi për çdo vepër të mbrojtur me të drejtë të autorit; ose kur me këtë Ligj parashihet, ata mund të menaxhohen kolektivisht, d.m.th. për disa vepra të disa autorëve në të njëjtën kohë.

## **Neni 163**

### **Menaxhimi i të drejtave përmes agjentit**

163.1. Menaxhimi i të drejtave të autorit përmes agjentit përfshin:

- a. përfaqësimin e autorëve në transaksionet e tyre ligjore dhe marrëdhëniet me personat fizikë apo subjektet juridike të cilët përdorin apo vënë në punë veprat e tyre, duke përfshirë mbledhjen e provizioneve apo pagesave të tjera;
- b. përfaqësimin e autorëve në procedura ligjore pranë gjykatave apo organeve të tjera, me qëllim të mbrojtjes së të drejtave të autorit.

163.2. Kur autori i realizon të drejtat e tij pranë gjykatës apo organit tjetër qeveritar përmes agjentit, i cili është person fizik apo juridik, agjenti i tillë ka të drejtë të kërkojë pagesë për shërbimet e tij dhe kompensimin për shpenzimet e bëra lidhur me këto shërbime sipas programit të agjentit për pagesa, me kusht që ai t'i plotësojë kushtet për përfaqësim pranë gjykatave apo organeve të tjera qeveritare ose, kur agjenti është person juridik, këto kushte t'i plotësojë punonjësi i autorizuar i agjentit të tillë.

## **Neni 164**

### **Fusha e administrimit kolektiv**

Administrimi kolektiv i të drejtave të autorit apo të drejtave të përafërta përfshin:

- a. transferimin joekskluziv të të drejtave mbi disa kategori të caktuara të veprave ose materialeve me të drejta të përafërta tek shfrytëzuesit;
- b. grumbullimin dhe kthimin e pagesave për shfrytëzimin e materialeve të mbrojtura me të drejtë të autorit;
- c. shpërndarjen e pagesave të grumbulluara bartësve të të drejtave;

d. ushtrimin e kontrollit mbi detyrimet kontraktuese dhe statutore të shfrytëzuesve dhe

e. realizimin e mbrojtjes së të drejtave pranë gjykatave dhe autoriteteve të tjera.

## **Neni 165**

### **Fusha e veprimtarisë së administrimit kolektiv**

Administrimi kolektiv i të drejtave mund të ekzistojë veçanërisht lidhur me:

a. Transmetimin tek publiku të veprave muzikore jo teatrore dhe të veprave letrare (të drejta të vogla);

b. Rishitjen e veprave origjinale të arteve të bukura/figurative (droits de suite);

c. Huadhënien publike të origjinalëve ose kopjeve të veprave;

d. Kompensimin për shfrytëzim privat apo shfrytëzim tjetër të brendshëm dhe fotokopjimin jashtë fushës së nenit 45 të këtij Ligji;

e. Ritransmetimin e materialeve të mbrojtura me të drejtë të autorit, përveç rasteve të transmetimeve të vet Transmetuesve, pavarësisht nëse të drejtat në fjalë janë të tyre apo atyre u janë caktuar nga bartës tjerë të të drejtave;

f. Riprodhimin e materialeve të mbrojtura me të drejtë të autorit në fonograme dhe videograme, duke përfshirë edhe të drejtat mekanike;

g. Qiradhënien e fonogrameve dhe videogrameve;



h. Riprodhimin e materialeve të mbrojtura me të drejtë të autorit për lexues dhe për tekste mësimore për qëllime të mësimdhënies;

i. Rishtypjen e artikujve mbi temat aktuale në botimet ditore apo periodike;

j. Riprodhimin e veprave të arteve të bukura, fotografive, planeve dhe vizatimeve në botimet ditore apo periodike;

k. Rishtypjen e pjesëve të veprave apo veprave të shkurtra letrare në botimet ditore apo periodike;

l. Riprodhimin dhe transmetimin publik të materialeve të mbrojtura me të drejtë të autorit në reklama që nuk zgjasin më shumë se gjashtëdhjetë sekonda dhe

m. Riprodhimin e veprave në vende përgjithësisht të qasshme për qëllime komerciale.

## **Neni 166**

Dispozitat e kësaj pjese lidhur me të drejtat e autorit zbatohen përshtatshmërisht për të drejtat e përafërta.

## **Neni 167**

167.1. Bartësi i të drejtës mund të kërkojë që personat, të cilët në çfarëdo mënyre janë të lidhur me shkeljen e të drejtave të njohura me këtë Ligj (prodhuesit, shtypshkronjat, importuesit, furnizuesit ose poseduesit e kopjeve ose mjeteve me të cilat është shkelur e drejta), të sigurojnë informacione dhe të nxjerrin dokumente lidhur me shkeljen, menjëherë pas dorëzimit të kërkesës.

167.2. Detyrimi i paraqitur në paragrafin paraprak nuk zbatohet kur kushtet janë të atilla që, dëshmitarit në procedurë civile i mundësojnë refuzimin e dëshmimit apo dhënies së përgjigjes në ndonjë pyetje të caktuar.

168.3. Nëse personat e paraqitur në paragrafin (1) të këtij neni nuk i sigurojnë informacionet e kërkuara ose nuk i japin dokumentet që i posedojnë, ata janë përgjegjës për dëmet që mund të shkaktohen nga mos përmbushja e detyrimit të tyre.

## **Kapitulli 2**

### **Menaxhimi kolektiv**

#### **Neni 168**

##### **Themelimi i zyrës për pronën intelektuale**

168.1. Qeveria e Kosovës do të themelojë Zyrën për të drejtat mbi pronën intelektuale (më tutje, “Zyra”) brenda tetëmbëdhjetë muajsh nga shpallja e këtij Ligji.

168.2. Në pritje të themelimit të kësaj Zyre, Ministria e Kulturës do të ushtrojë funksionet administrative të caktuara kësaj Zyre me anë të këtij Ligji. Ministria e Kulturës do të miratojë udhëzime administrative për zbatimin e këtyre dispozitave brenda gjashtë muajsh nga shpallja e këtij Ligji.

#### **Neni 169**

##### **Administrimi kolektiv i të drejtave të autorit**

169.1. Me certifikimin e Zyrës, aktiviteti i administrimit të të drejtave të autorit mund të realizohet përmes asociacioneve të autorëve dhe bartësve të tjerë të të drejtave, si dhe përmes subjekteve të tjera ligjore të specializuar në administrimin e të drejtave të autorit.

169.2. Për administrimin e të drejtave të autorit të realizuar nga asociacioni i autorëve apo nga subjekti tjetër i specializuar ligjor nga paragrafi 1, me përjashtim të të drejtave nga paragrafi 3, nevojitet dhënia e autorizimit nga autori apo nga poseduesi tjetër i të drejtës së autorit.

169.3. Të drejtat e autorit në shfaqjet publike të veprave muzikore apo letrare joperformuese (petites droits) mund të administrohen nga asociacioni i autorëve edhe pa autorizimin e autorit ose të poseduesit tjetër të së drejtës së autorit.

169.4. Zyra do të certifikojë asociacionet nga paragrafi 1 të cilat i përmbushin kriteret profesionale të vendosura nga Zyra.

169.5. Nëse asociacioni i autorëve apo subjekti tjetër ligjor i specializuar në administrimin kolektiv të të drejtave të autorit më nuk i përmbush kriteret e përshkruara për kryerjen e aktiviteteve të tilla, Zyra e anulon certifikimin e dhënë.

## **Neni 170**

### **Certifikimi i asociacioneve kolektive**

Zyra do të jep certifikatat nga neni 170.1 pas paraqitjes së kërkesës me shkrim nga subjekti ligjor. Kërkesës i bashkëngjitet:

- a. statuti i cili përcakton organet dhe kompetencat e tyre për kryerjen e detyrave të asociacioneve kolektive nga neni 170;
- b. të dhënat për personat të cilët kanë të drejtë të përfaqësojnë asociacionet kolektive;
- c. autorizimin e shkruar nga autorët të cilët asociacionit kolektiv ia kanë besuar menaxhimin e të drejtave të autorit për veprat e tyre të grumbulluara në repertor;
- d. planin e biznesit dhe

- e. dokumente të tilla të tjera që mund t'i kërkojë Zyra për të treguar se asociacioni kolektiv i plotëson kriteret e vendosura nga Zyra sipas këtij Ligji.

## **Neni 171**

### **Mos certifikimi i asociacioneve kolektive**

171.1. Zyra nuk jep apo nuk ripërtëritë certifikatën nëse:

- a. statuti i asociacionit kolektiv nuk është në pajtim me dispozitat e këtij Ligji ose
- b. asociacioni kolektiv nuk i respekton kërkesat financiare dhe ato të raportimit të paraqitura në nenet 176-181 të këtij Ligji.

171.2. Zyra e anulon certifikimin për menaxhimin kolektiv të të drejtave të autorit nëse paraqiten rrethana të tilla të cilat mund të jenë shkak për refuzimin e certifikimit, ose nëse asociacioni kolektiv shkel rëndë apo në vazhdimësi dispozitat e këtij Ligji. Para anulimit, autoriteti kompetent e njofton asociacionin kolektiv për arsyet dhe i jep afat kohor jo më pak se 30 ditë për të eliminuar shkakun për anulim. Anulimi bëhet i plotfuqishëm në ditën e 30-të pas shpalljes.

## **Neni 172**

172.1. Për procedurën e dhënies së certifikimit zbatohet Ligji për rregullimin e procedurave të përgjithshme administrative. Ndaj vendimit apo urdhrit të lëshuar nga Zyra nuk ka të drejtë ankese. Mirëpo, në gjykatën kompetente mund të ngritët padi përmes procedurës së kontesteve administrative.

172.2. Njoftimi mbi vendimin përfundimtar lidhur me certifikimin do të botohet.

## **Neni 173**

173.1. Për asociacionin kolektiv nga neni 170.1 nuk kërkohet autorizim i veçantë i autorit për të siguruar ushtrimin e të drejtave të autorit nga neni 170.3 pranë gjykatave dhe organeve të tjera.

173.2. Asociacioni kolektiv nga neni 170.1 mund të inicojë dhe të drejtojë kontestin nga paragrafi 1 në emër të tij por obligohet të njoftojë autorin mbi të drejtat e ushtruara.

## **Neni 174**

174.1. Asociacionet që administrojnë të drejtat ekonomike në mënyrë kolektive do të kryejnë funksionet vijuese:

- a. arrijnë marrëveshje me shfrytëzuesit e veprave lidhur me shumën e pagesës, procedurat e pagimit dhe dispozitave të tjera me anë të të cilave lëshohen licencat;
- b. lëshojnë licenca shfrytëzuesve për të ushtruar të drejtat, të cilat administrohen nga asociacioni i caktuar, dhe mbledhin pagesat e përcaktuara në licenca;
- c. përcaktojnë kompensimin e drejtë në rastet kur shoqata ka obligim për të administruar të drejtat ekonomike të bartësve të të drejtave të autorit dhe të drejtave të përafërta në bazë të ligjit, dhe të mbledhin pagesën e përcaktuar;
- d. mbledhin pagesën për rishitjen e veprave të artit, për riprodhimin e veprave për shfrytëzim personal, dhe për lloje të tjera të shfrytëzimit të veprave në pajtim me ligjet rregullative dhe
- e. ndajnë paratë e mbledhura dhe ua paguajnë bartësve të të drejtave të autorit dhe të drejtave të përafërta.

174.2. Funksionet tjera të asociacioneve që administrojnë të drejtat ekonomike në baza kolektive do të përcaktohen në kontratën që është lidhur në mes të asociacionit përkatës dhe bartësit të të drejtave të autorit apo të drejtave të përafërta.

## **Neni 175**

### **Detyrat e asociacioneve kolektive**

175.1. Asociacionet që administrojnë të drejtat ekonomike në mënyrë kolektive, gjatë aktiviteteve të tyre, do të paraqesin të drejtat dhe interesat e ligjshme të bartësve të të drejtave të autorit dhe të drejtave të përafërta, në pajtim me kontratat e lidhura për shfrytëzimin e veprave. Asociacionet e tilla do të kryejnë detyrat vijuese:

- a. u sigurojnë raport autorëve për shfrytëzimin e veprave të tyre, interpretimeve dhe aktiviteteve të tjera kur e bëjnë pagesën për bartësit e të drejtave të autorit dhe të drejtave të përafërta dhe
- b. pas zbritjeve të përcaktuara në paragrafin 2 të këtij neni, ndajnë shumën e parave të mbledhura në mes të bartësve të të drejtave të autorit dhe të drejtave të përafërta të përfaqësuar nga asociacionet e tilla, në proporcion me shfrytëzimin e veprave (punës) së tyre, interpretimeve dhe aktiviteteve të tjera, dhe këto pagesa i bëjnë rregullisht.

175.2. Asociacionet që administrojnë të drejtat ekonomike në mënyrë kolektive mbulojnë shpenzimet reale të shoqëruara me mbledhjen, ndarjen dhe pagesën e kompensimit nga shumat e parave të mbledhura në pajtim me kontratat e lidhura.

175.3. Asociacionet që administrojnë të drejtat ekonomike në mënyrë kolektive mund të krijojnë fonde speciale në interes të bartësve të të drejtave të autorit dhe të drejtave të përafërta duke zbritur nga shumat e grumbulluara, në pajtim me objektivat dhe detyrat e asociacionit që administron të drejtat ekonomike në mënyrë kolektive.

175.4. Bartësit e të drejtave të autorit dhe të drejtave të përafërta, të cilët nuk kanë asociacione të autorizuar për të grumbulluar shumën e kompensimit të përcaktuar në nenin 175 të këtij Ligji, kanë të drejtë që nga asociacioni të kërkojnë që të paguaj kompensimin që duhet ta paguaj në pajtim me ndarjen e shumës së parave që është bërë, si dhe të përjashtojë veprat e tyre dhe punën e kryer nga licencat që asociacionet e tilla ua lëshojnë shfrytëzuesve të veprave të tyre.

175.5. Asociacionet që administrojnë të drejtat ekonomike në mënyrë kolektive botojnë dhe u shpërndajnë anëtarëve të tyre raportet vjetore, si dhe shumën e kompensimit në rastet kur asociacioni ka obligim të administrojë të drejtat ekonomike të bartësve të të drejtave të autorit dhe të drejtave të përafërta në bazë të ligjit.

175.6. Së paku njëzet e pesë përqind (25%) e anëtarëve të asociacionit kolektiv mund të kërkojnë që një apo më shumë ekspert të pavarur të inspektojnë veprimtarinë e shoqërisë.

## **Neni 176**

### **Marrëveshjet reciproke me asociacionet e jashtme**

176.1. Asociacionet kolektive do të lidhin marrëveshje reciproke me asociacionet korresponduese në shtetet tjera për të siguruar administrim kolektiv të të drejtave të autorit dhe të drejtave të përafërta të bartësve të të drejtave në Kosovë, si dhe për bartësit e huaj të të drejtave në Kosovë.

## **Neni 177**

### **Mbikëqyrja e asociacioneve kolektive**

177.1. Zyra do të mbikëqyrë nëse aktivitetet e organizatave të cilat i administrojnë të drejtat ekonomike në baza kolektive janë në përputhje me dispozitat e ligjit, veçanërisht do të mbikëqyrin nëse:

- a. dispozitat lidhur me grumbullimin dhe ndarjen e kompensimit janë të drejta;
- b. shpenzimet e administrimit janë të arsyetuara;
- c. ndarja e kompensimit dhe pagesat bëhen në pajtim me procedurat e përcaktuara;
- d. shfrytëzuesit nuk i mohohet dhënia e licencës pa e vërtetuar bazën dhe

- e. asociacionet kolektive kanë marrëveshje reciproke adekuate me asociacionet e huaja, ashtu siç kërkohet me nenin 177 të këtij Ligji.

177.2. Shoqatat që administrojnë të drejtat ekonomike në mënyrë kolektive Zyrës i dorëzojnë marrëveshjen e asociacionit, raportet vjetore mbi aktivitetet e tyre si dhe sigurojnë informacionet që janë të nevojshme për Zyrën për të vendosur mbi çështjet nën kompetence të tyre.

177.3. Për të siguruar mbikëqyrjen, Zyra do të themelojë një bord këshillëdhënës të përbërë nga përfaqësues të organizatave të interesuara, ekspert dhe bartës të të drejtave të autorit dhe të drejtave të përafërta.

## **Neni 178**

### **Raportet vjetore**

178.1. Statuti i asociacionit kolektiv përfshin dispozita që brenda tre muajsh pas përfundimit të çdo bilanci vjetor, asociacioni kolektiv të miratojë ose sigurojë:

- a. raportet vjetore të organeve administrative dhe mbikëqyrëse mbi paratë e mbledhura, shpërndarjen e tyre, veprimet e asociacionit kolektiv dhe zbatimin e marrëveshjeve inkluzive dhe marrëveshjeve me asociacionet e huaja kolektive;
- b. raportin e kompanisë së revizionit lidhur me kontrollimin e pasqyrave financiare dhe veprimet e asociacionit kolektiv në vitin afarist së bashku me mendimin lidhur me rregullsinë e veprimeve dhe përputhshmërinë me ligjet dhe rregulloret tjera;
- c. mendimin e organeve administrative dhe mbikëqyrëse lidhur me raportet dhe mendimin e cekur në pjesën e mëparshme;
- d. masat që duhet ndërmarrë në rastet kur, sipas mendimit të revizorit, ka parregullsi;



- e. propozimi për planin financiar dhe shpenzimet operacionale të asociacionit kolektiv për vitin pasues.

178.2. Dispozitat e këtij neni nuk i cenojnë obligimet e asociacioneve kolektive të cilat ata i kanë lidhur me raportet financiare dhe revizionet në pajtim me ligjet dhe rregulloret tjera.

### **Neni 179**

Në çdo kohë, Zyra mund të kërkojë raporte nga asociacioni kolektiv mbi çështjet afariste dhe inspektimin e librave të tyre dhe të dokumenteve të tjera afariste deri në masën e nevojshme, pas dorëzimit të kërkesës me shkrim, të detajuar dhe të arsyetuar, për kontrollimin e çështjes së përcaktuar në kërkesë.

### **Neni 180**

180.1. Asociacionet kolektive e njoftojnë Zyrën për çdo ndryshim lidhur me personat që me ligj ose statut kanë të drejtë t'i përfaqësojnë ata.

180.2. Asociacionet kolektive i dorëzojnë Zyrës veçanërisht:

- a. çdo ndryshim të statutit;
- b. marrëveshjet e përgjithshme (inkluzive) me asociacionet e shfrytëzuesve;
- c. tarifat dhe çdo ndryshim të tyre;
- d. marrëveshjet me asociacione të jashtme kolektive;
- e. vendimet e mbledhjeve;
- f. raportet vjetore dhe ata të revizorit.

## **Neni 181**

### **Ndërmjetësimi**

181.1. Asociacionet kolektive dhe përfaqësuesit e shfrytëzuesve mund të propozojnë ndërmjetësimin në një kontest në bazë të marrëveshjes së ndërmjetësimit:

- a. lidhur me marrëveshjen e përgjithshme (inkluzive);
- b. lidhur me lidhjen e një marrëveshjeje për ritransmetim kabllorik të emisioneve radio-televizive;
- c. lidhur me:
  - i. shfrytëzimin në dobi të njerëzve me paaftësi;
  - ii. shfrytëzimit për qëllime të mësimdhënies;
  - iii. riprodhimet private ose riprodhimet tjera të brendshme;
  - iv. kryerja e procedurave zyrtare dhe
  - v. incizime kalimtare të realizuara nga transmetuesit.

181.2. Ndërmjetësi është i pavarur, i paanshëm dhe nuk u bindet udhëzimeve.

181.3. Ndërmjetësi siguron që palët të zhvillojnë negociata në mirëbesim dhe të mos i pengojnë ato pa arsyetim valid.

181.4. Ndërmjetësi mund t'u japë propozime palëve lidhur me zgjidhjen e kontestit. Propozimi për zgjidhje të kontestit konsiderohet se është pranuar nëse palët lidhin marrëveshje të përgjithshme (inkluzive) ose marrëveshje për ritransmetim brenda tre muajsh pas marrjes së propozimit.

181.5. Në procedurën e ndërmjetësimit sigurohet konfidencialiteti.

181.6. Palët bashkërisht e zgjedhin ndërmjetësin nga lista e ndërmjetësve të caktuar nga Zyra.

181.7. Zyra i ofron ndihmë administrative ndërmjetësit.

181.8. Palët e paguajnë ndërmjetësin për punën e tij.

181.9. Zyra përkufizon në detaje procedurën e ndërmjetësimit, si dhe diplomën dhe llojin e arsimit të ndërmjetësit, dhe kushtet tjera që ai duhet t'i përmbushë.

## **PJESA V**

### **Kapitulli 1**

#### **DISPOZITA TË PËRGJITHSHME**

##### **1. Personat që gëzojnë mbrojtje**

###### **Neni 182**

182.1. Personi, të cilit i janë cenuar të drejtat që mbrohen me këtë ligj (titullari i së drejtës), mund të kërkojë mbrojtjen e të drejtave të tij dhe zhdëmtim përkatës në varësi me cenimin.

182.2. Mbrojtje e njëjtë e të drejtave mund të kërkohet edhe kur është i dukshëm rreziku i cenimit të të drejtave të mbrojtura me këtë ligj.

182.3. Mbrojtja e parashikuar nga dispozitat tjera ligjore mbetet e paprekur.

## **2. Solidarësia e palëve**

### **Neni 183**

183.1. Kur janë më shumë se një titullar i një të drejte që u është cenuar e që njihet nga ky ligj, secili prej tyre mund të kërkojë mbrojtjen e së drejtës së tillë në tërësinë e saj.

183.2. Kur ekzistojnë më shumë se një cenes të një të drejte të titullarit që njihet nga ky ligj, secili prej tyre përgjigjet për dëmin e tërësishëm.

## **3. Mbrojtja e masave teknologjike**

### **Neni 184**

184.1. Konsiderohet se një person ka cenuar të drejtat ekskluzive që njihen nga ky ligj nëse ka bërë çfarëdo veprimi për t'i shmangur masat teknologjike efektive.

184.2. Konsiderohet se një person ka cenuar të drejtat ekskluzive që njihen nga ky ligj, në rast se i punon, importon për shpërndarje, shet, jep me qira, reklamon për shitje a qiradhënie ose mban për qëllime komerciale teknologji, mjet ose program kompjuteri, ose pa autorizim kryen shërbime, të cilat:

- a). reklamohen a tregtohen nergut për shmangien e masave teknologjike efektive;
- b). kanë qëllim të dukshëm komercial ose përdorim vetëm në aspektin e shmangies së masave teknologjike efektive;

- c). janë disenjuar, prodhuar, përshtatur apo punuar para së gjithash për shmangien e masave teknologjike efektive.

184.3. Në kuptim të paragrafit paraprak, masë teknologjike është çdo teknologji, program kompjuteri a një mjet tjetër i cili është parashikuar që gjatë veprimit të vet normal, të parandalojnë ose të pengojnë cenimin e të drejtave të mbrojtura. Këto masa do të konsiderohen efektive aty ku hyrja ose përdorimi i veprës së autorit ose i lëndës nga të drejtat e afërta kontrollohet nëpërmjet proceseve të mbrojtjes me të cilat, në mënyrë operative dhe të besueshme dhe me autorizimin e titullarëve të të drejtave, arrihen qëllimet e mbrojtjes.

184.4. Ky nen do të aplikohet ngjashëm dhe aq sa i takon (mutatis mutandis) edhe ndaj çdo teknologjie, mjeti apo programi kompjuterik, me të cilin informacionet elektronike të administrimit të të drejtave hiqen ose ndryshohen (neni 186).

#### **4. Mbrojtja e informacioneve të administrimit të të drejtave**

##### **Neni 185**

185.1. Konsiderohet se një person ka cenuar të drejtat ekskluzive që njihen nga ky ligj kur bën një nga veprimet e mëposhtme, me të cilin nxit, mundëson, lehtëson ose fsheh cenimet e të drejtave nga ky ligj:

- a). heqjen ose ndryshimin e cilitdo informacion elektronik lidhur me administrimin e të drejtave;
- b). reprodukimin, importin për shpërndarje, qiradhënien ose komunikimin publikut të një lënde të mbrojtur, në të cilën informacioni elektronik i administrimit të të drejtave është hequr apo ndryshuar pa autorizim përkatës.

185.2. Informacion i administrimit të të drejtave në kuptimin e paragrafit paraprak konsiderohet çdo informacion i futur nga ana e titullarit të së drejtës, me të cilin identifikohet lënda që është objekt i të drejtave, autori, titullari i së drejtës, kohëzgjatja dhe kushtet e përdorimit, si dhe numrat dhe kodet e tyre përkatëse që shënohen në ekzemplarin e lëndës së mbrojtur ose që shfaqen me rastin e komunikimit të lëndës së mbrojtur.

## **Kapitulli 2**

## **MBROJTJA GJYQËSORE**

### **1. Kërkesëpaditë**

#### **Neni 186**

186.1. Në rast të cenimit të të drejtave ekskluzive që njihen nga ky ligj, titullari i të drejtësi mund të kërkojë:

- a). përcaktimin e cenimit të së drejtës;
- b). që cenesit t'i ndalohen veprimet e njëmendta përgatitore për bërjen e cenimit, vetë bërja e cenimit, si dhe përsëritja e cenimit;
- c). ndreqjen e gjendjes së shkaktuar nga cenimi, duke përfshirë edhe tërheqjen e ekzemplarëve nga tregu, me shpenzime të cenesit;
- d). shkatërrimin ose ndryshimin e ekzemplarëve të paligjshëm të vënë në qarkullim ose që janë për t'u vënë në qarkullim (ambalazhi i tyre, masteri, xhirimet, shiritat, negative etj);
- e). shkatërrimin ose ndryshimin e veglave dhe të mjeteve që janë përdorur ose që shërbejnë para së gjithash apo nergut për kryerjen e cenimit e që janë pronë e cenesit;
- f). kompensimin e dëmit material (dëmi aktual dhe fitimi i humbur) ose zhdëmtim të posaçëm;
- g). kompensimin e dëmit jomaterial në rast të cenimit të të drejtave morale të autorit apo të interpretuesit;
- h). shpalljen e aktgjykimit në masmedia, me shpenzime të cenesit.

186.2. Dispozitat nën pikat (d) dhe (e) të paragrafit paraprak nuk zbatohen ndaj objekteve arkitekturore, përveç kur shkatërrimi ose ndryshimi i objektit mund të arsyetohet me rrethana të rastit.

186.3. Në vend të kërkesave nën pikat (d) dhe (e) të paragrafit (1) të këtij neni, titullari i së drejtës mund të kërkojë nga cenesi që t'ia dorëzojë ekzemplarët apo mjetet e tilla për një kompensim që nuk mund të tejkalojë shpenzimet e prodhimit ose çmimin e prodhimit, të pakësuar për amortizimin e tyre.

## **2. Zhdëmtimi i posaçëm**

### **Neni 187**

187.1. Në vend të kompensimit të dëmit material, titullari i së drejtës mund të kërkojë që cenuesi t'ia dorëzojë gjithë fitimin e arritur me cenimin e së drejtës.

187.2. Në vend të kompensimit të dëmit material, titullari i së drejtës mund të kërkojë që cenuesi t'ia paguajë kompensimin që do të ishte i detyruar të paguante për shfrytëzimin e ligjshëm të lëndës së mbrojtur, por të shtuar deri në dyfishin e tij, e nëse cenimi është bërë për fitim komercial - të shtuar deri në trefishin e tij.

187.3. Nëse dëmi material është më i madh se zhdëmtimi në kuptimin e paragrafëve të mësipërme, titullari i së drejtës ka të drejtë të kërkojë diferencën deri në kompensim të plotë të dëmit.

## **Zhdëmtimi monetar i dëmit jomaterial**

### **Neni 188**

Autori ose interpretuesi ka të drejtë në zhdëmtim të duhur monetar për shkak të cenimit të të drejtave morale të tij të mbrojtura me këtë ligj.

## **4. Masat paraprake**

### **Neni 189**

189.1. Me kërkesën e titullarit të së drejtës, i cili ka prova të bazuara se i është cenuar e drejta e tij ekskluzive që njihet me këtë ligj dhe se ekziston rreziku që të mos jetë i zhdëmtuar, gjyqi mund të

urdhërojë konfiskimin e përkohshëm të pasurisë së tundshme të cenesit, duke përfshirë edhe bllokimin e llogarisë së tij bankare dhe të pasurisë tjetër të tundshme.

189.2. Kjo masë përfshin edhe mundësinë e gjyqit që të urdhërojë dhe sekuestrojë dokumentet bankare financiare ose dokumentet komerciale të cenesit.

189.3. Nëse ekziston dyshimi i bazuar që mbrojtja nga paragrafët paraprakë 1 dhe 2 të këtij neni të mos jetë efektive shkaku i vonës, gjyqi mund të urdhërojë dhe të ekzekutojë këto masa edhe pa dëgjimin e palës tjetër (inaudita altera parte).

189.4. Procedura lidhur me masat paraprake zbatohet brenda 3 ditëve pas parashtrimit të kërkesës.

## **5. Masat e përkohshme**

### **Neni 190**

190.1. Me kërkesën e titullarit të së drejtës, i cili ka prova të bazuara se i është cenuar e drejta e tij ekskluzive që njihet me këtë ligj, gjykata mund të urdhërojë si masa të përkohshme:

- a). sekuestrimin dhe heqjen nga qarkullimi të ekzemplarëve, mjeteve dhe pajisjeve që kanë të bëjnë me cenimin, si dhe sekuestrimin e dokumenteve përkatëse;
- b). ndalesën e cenimeve të pritura ose ndalesën e vazhimit të kryerjes së cenimeve.

190.2. Nëse ekziston dyshimi i bazuar që mbrojtja sipas paragrafit paraprak (1) të këtij neni, të mos jetë efektive shkaku i vonës, gjykata mund të urdhërojë dhe të ekzekutojë këto masa edhe pa dëgjimin e palës tjetër (inaudita altera parte).

190.3. Procedura lidhur me masat e përkohshme zbatohet brenda 7 ditëve pas parashtrimit të kërkesës.



190.4. Në rast të kërkesë padisë për shkak të mos pagesës së kompensimit, gjyqi mund të nxjerrë si masë të përkohshme ndalesën e shfrytëzimit të mëtutjeshëm të lëndës së mbrojtur.

190.5. Dispozitat e përgjithshme ligjore lidhur me procedurën e përmbarimit zbatohen edhe me rastin e miratimit të masave të përkohshme, nëse me këtë ligj nuk përcaktohet ndryshe.

## **6. Sigurimi i provave**

### **Neni 191**

191.1. Me kërkesë të titullarit të së drejtës, i cili ka prova të bazuara se i është cenuar e drejta ekskluzive që njihet nga ky ligj dhe se ekziston rreziku i mundshëm që provat për cenimin e së drejtës të shkatërrohen ose që më vonë të jetë e pamundur të sigurohen, gjyqi mund të urdhërojë sigurimin e provave.

191.2. Sigurimi i provave sipas paragrafit paraprak konsiderohet kontrollimi i lokaleve, i inventarit, librave të evidencave, dokumenteve, bazave të të dhënave etj., si dhe sekuestrimi i dokumentacionit, marrja në pyetje e dëshmitarëve dhe e ekspertëve.

191.3. Nëse ekziston rreziku i bazuar që sigurimi i provave në kuptim të paragrafit paraprak (2) të këtij neni të mos jetë efektiv shkak i vonesës, gjyqi mund të urdhërojë dhe të ekzekutojë sigurimin e provave edhe pa dëgjimin e palës tjetër (inaudita altera parte).

191.4. Vendimi i gjyqit për zbatimin e sigurimit të provave do t'i dorëzohet palës kundërshtare në momentin e mbledhjes së provave, por nëse kjo nuk është e mundur për shkak të mos pranisë, atëherë do t'i dorëzohet pasi të jetë e mundur.

191.5. Procedura lidhur me sigurimin e provave zbatohet brenda 7 ditëve pas parashtimit të kërkesës.

## **7. Shpejtimi i procedurës**

### **Neni 192**

Procedura lidhur me cenimet e së drejtës së autorit dhe e së drejtave të afërta është e shpejtë. Gjykata do të caktojë seancën e parë të dëgjimit jo më vonë se brenda 3 muajve që nga dita e pranimi të kërkesëpadisë.

## **8. Kompetenca**

### **Neni 193**

Për proceset lidhur me të drejtën e autorit dhe të drejtat e afërta vendos Gjyqi i Qarkut në Prishtinë.

## **Kapitulli 3**

### **MASAT PËR ZBATIMIN E MBROJTJES**

#### **1. Detyrimi për dhënie informacioni**

##### **Neni 194**

194.1. Gjyqi mund t'i urdhërojë personit që është në çfarëdo lidhje me cenimin e të drejtave që njihen nga ky ligj (radhitësit apo stampuesit, prodhuesit, importuesit, furnitorit, pronarit të ekzemplarit të lëndës së mbrojtur etj.) që ky menjëherë t'i japë gjyqit informacionin ose t'ia dorëzojë dokumentet që kanë të bëjnë me cenimin.

194.2. Urdhrit nga paragrafi paraprak nuk i detyrohen personat që i plotësojnë kushtet ekzistuese ligjore për të refuzuar daljen dëshmitarë.

194.3. Personi që nuk përmbush detyrimin nga paragrafi (1) i këtij neni është i përgjegjshëm për dëmin e shkaktuar me mosveprim.

## **2. Masat doganore**

### **Neni 195**

195.1. Me propozimin e titullarit të së drejtës, i cili justifikon dyshimin se e drejta e tij ekskluzive që njihet nga ky ligj do të cenohet me importin e mallit të caktuar, autoriteti doganor mund të vendosë:

- a). që titullari i së drejtës apo përfaqësuesi i tij të kontrollojnë mallin përkatës dhe dokumentacionin shoqërues;
- b). që kalimi i mallit të shtyhet dhe malli të ndalohet.

195.2. Në propozimin e vet për ndërmarrjen e masave doganore nga paragrafi paraprak titullari i së drejtës duhet patjetër të paraqesë një përshkrim të hollësishëm të mallit përkatës si dhe prova përkatëse për të drejtat e veta ekskluzive të mbrojtura me këtë ligj dhe cenimin e mundshëm të tyre.

195.3. Lidhur me masat e miratuara, autoriteti doganor do ta njoftojë menjëherë importuesin ose pranuesin e mallit.

195.4. Autoriteti doganor do të revokojë masat e miratuara në rast se, brenda afatit prej 10 ditë pune, nuk njoftohet që titullari i së drejtës:

- a). ka bërë kërkesë gjyqit për caktimin e masave të përkohshme a për sigurimin e provave; ose
- b). ka bërë kërkesëpadi apo ka nisur një proces tjetër që çon në zgjidhje në mënyrë ligjore të rastit; ose
- c). ka propozuar një marrëveshje me shkrim deklaruesit, zotëruesit ose pronarit të mallit për shkatërrimin e tij.

195.5. Në rastet e përshtatshme, autoriteti doganor mund të shtojë afatin nga paragrafi paraprak (4) i këtij neni edhe për maksimum 10 ditë pune.

195.6. Kur malli është i dëmtueshëm, afati nga paragrafi (4) i këtij neni do të jetë tri ditë pune dhe nuk mund të vazhdohet.

195.7. Nëse titullari i së drejtës dhe importuesi apo pranuesi i mallit kanë bërë aktbarazim brenda afateve nga ky nen, atëherë autoriteti doganor vepron në përputhje me barazimin e bërë.

195.8. Në rast se autoriteti doganor ka dyshim të bazuar se me importin e mallit të caktuar do të mund të cenoheshin të drejtat ekskluzive në kuptimin e këtij ligji, dhe atë para se të jetë paraqitur ndonjë propozim në kuptimin e paragrafit (1) të këtij neni, mund të vendosë që kalimi i mallit të shtyhet ose që ai të ndalohet për një afat prej tri ditë pune.

### **3. Regjistri i veprave të autorit dhe të lëndëve nga të drejtat e afërta**

#### **Neni 196**

196.1. Për të siguruar provat ose për një arsye tjetër, titullarët e të drejtave që u njihen nga ky ligj mund të deponojnë te Zyra ekzemplarët e veprave të veta ose të lëndëve nga të drejtat e afërta.

196.2. Ekzemplarët e veprave dhe të lëndëve që deponohen duhet të jenë në formë të dokumentit të shkruar (dorëshkrim, tekst i shtypur, partitura muzikore), në formë regjistrimi të tingullit, pamjes ose tingullit dhe pamjes ose në formë digjitale.

196.3. Regjistri mbahet për çdo kategori të veprave të autorit dhe të lëndëve nga të drejtat e afërta. Regjistri është publik.

196.4. Me rastin e deponimit dhe futjes në evidence të veprave të autorit dhe të lëndëve nga të drejtat e afërta, titullari i tyre është i detyruar të japë të dhëna të sakta dhe të plota për veprën ose për lëndën nga të drejtat e afërta.

196.5. Të dhënat në evidence prezumohen të vërteta, derisa nuk provohet ndryshe.

196.6. Personi i ndërgjegjshëm që ka cenuar të drejtën e autorit a të drejtën e afërt të huaj, duke u mbështetur në saktësinë e të dhënave në evidencë, nuk është përgjegjës për atë cenim.

196.7. Futja në regjistër dhe deponimi i ekzemplarit të veprave të autorit dhe i lëndëve nga të drejtat e afërta, në asnjë mënyrë nuk ndikon në përfitimin dhe kohëzgjatjen e të drejtave në kuptimin e këtij ligji.

196.8. Përmbajtja e evidencave nga paragrafi (3) i këtij neni dhe kushtet që duhet plotësuar për deponimin e veprave të autorit dhe të lëndëve nga të drejtat e afërta, rregullohen me akt nënligjor nergut për zbatimin e këtij neni.

#### **4. Doganat**

##### **Neni 197**

197.1. Kur prodhuesi apo shpërndarësi i kopjeve shkel të drejtat e autorit ose çdo të drejtë tjetër të mbrojtur me këtë Ligj, me kërkesë të bartësit të të drejtave dhe ndaj sigurisë së tij, ato kopje do të konfiskohen nga autoritetet doganore gjatë importit apo eksportit në rastet kur shkelja është evidente. Kjo dispozitë do të zbatohet në marrëveshje me shtetet tjera vetëm nëse kontrollet kryhen nga autoritetet doganore.

197.2. Kur autoritetet doganore urdhërojnë konfiskimin, ata e njoftojnë personin që ka të drejtë të rregullojë(sistemoj) si dhe kërkuesin pa vonesë. Vendburimi, sasia dhe vendi i ruajtjes së kopjeve, së bashku me emrin dhe adresën e personit që ka të drejtë të rregullojë ato do t'i komunikohen kërkuesit. Kërkuesit i jepet mundësia që të inspektojë kopjet kur inspektimi i tillë nuk përbën shkelje të fshehtësisë komerciale apo tregtare.

197.3. Kur nuk ka kundërshtime për konfiskimin, së paku dy javë nga dërgimi i njoftimit, autoritetet doganore urdhërojnë konfiskimin e kopjeve të zëna.

197.4. Nëse personi që ka të drejtë të rregullojë kundërshton konfiskimin, autoritetet doganore pa vonesë e njoftojnë kërkuesin për këtë. Nga kërkuesi kërkohet që pa vonesë të deklarohet pranë autoriteteve doganore nëse ai qëndron pas kërkesës lidhur me konfiskimin e kopjeve:

- a. Nëse kërkuksi e tërheq kërkesën, autoritetet doganore e heqin konfiskimin pa vonesë.
- b. Nëse kërkuksi qëndron pas kërkesës dhe dorëzon vendim të ekzekutueshëm të gjyqit me të cilin urdhërohet mbledhja e kopjeve të konfiskuara apo kufizimin e të drejtës për të rregulluar (sistemuar) kopjet, autoritetet doganore do të ndërmarrin masat e nevojshme.
- c. Kur asnjëri nga rastet nën pikën (a) dhe (b) nuk janë të zbatueshme, autoritetet doganore e heqin konfiskimin pas kalimit të periudhës dyjavore nga dorëzimi i njoftimit.

197.5. Kur konfiskimi vërtetohet se ka qenë i paarsyeshëm që nga fillimi dhe nëse kërkuksi ka qëndruar pas kërkesës së tij lidhur me kopjet e konfiskuara apo nuk është deklaruar pa vonesë, nga ai do të kërkohej që të kompensojë dëmin.

197.6. Shpenzimet për aktet zyrtare lidhur me kërkesën i ngarkohen kërkuksit.

## **PJESA VI**

### **SHKELJET ADMINISTRATIVE**

#### **Kapitulli 1**

### **VEPRA PENALE**

#### **1. Cenimi i të drejtave morale të autorit dhe interpretuesve**

##### **Neni 198**

198.1. Ai që publikon në emrin e vet, në emrin e një tjetri ose në një mënyrë tjetër ia komunikon publikut veprën e huaj apo interpretimin e huaj, dënohet për vepër penale me burgim prej tre muajve deri në tre vjet.

198.2. Ai që gjatë shfrytëzimit të veprës së autorit a të interpretimit të interpretuesit qëllimisht lë pas dore të tregojë emrin, pseudonimin apo shenjën e autorit a të interpretuesit, kur kjo kërkohet sipas këtij ligji, dënohet për vepër penale me gjobë ose me burgim deri në një vit.

198.3. Ai që shtrembëron, gjymton ose me një mënyrë tjetër dëmton veprën e autorit ose interpretimin e huaj, dhe si të tillë e publikon ose ia komunikon publikut, ose kush veprën e autorit apo interpretim ia komunikon publikut në mënyrë poshtëruese, me kusht që secili nga këto veprime të cenojë nderin dhe namin e autorit apo interpretuesit, dënohet për vepër penale me gjobë ose me burgim deri në një vit.

## **2. Shfrytëzimi i paautorizuar i veprës së autorit**

### **ose i lëndëve nga të drejtat e afërta**

#### **Neni 199**

199.1. Ai që e shfrytëzon pa leje veprën e autorit ose lëndën nga të drejtat e afërta, dënohet për vepër penale me burgim deri në tre vjet.

199.2. Nëse me veprën penale nga paragrafi (1) i këtij neni, kryesi i veprës ka arritur përfitim ekonomik për vete apo për një tjetër prej 10.000 deri në 50.000 €, dënohet për vepër penale prej tre muajve deri në pesë vjet.

199.3. Nëse me veprën penale nga paragrafi (1) i këtij neni kryesi i veprës ka arritur përfitim ekonomik për vete apo për një tjetër mbi 50.000 €, dënohet për vepër penale me burgim prej gjashtë muajve deri në tetë vjet.

## **3. Shmangia e masave teknologjike**

#### **Neni 200**

Ai që bën çfarëdo veprimi për të shmangur çfarëdo mase teknologjike efektive (neni 185), ose kush bën veprimin e heqjes apo ndryshimit të informacionit elektronik të administrimit të të drejtave (neni 186), dënohet për vepër penale me burgim deri në tre vjet.

#### **4. Shkatërrimi ose dëmtimi i kopjes së parë standarde të filmit**

##### **Neni 201**

Ai që shkatërron, dëmton ose e bën të papërdorshme kopjen e parë standarde të filmit, dënohet për vepër penale me gjobë ose me burgim deri në gjashtë muaj.

#### **5. Refuzimi i dhënies së informacionit**

##### **Neni 202**

Ai që refuzon t'i japë gjyqit informacionin ose refuzon t'i japë në shqyrtim dokumentacionin që tok ka të bëjë me cenimin e së drejtës së autorit a të drejtave të afërta (neni 199), dënohet për vepër penale me gjobë ose me burgim deri në gjashtë muaj.

#### **6. Ndjekja penale**

##### **Neni 203**

Veprat penale nga neni 199 i këtij ligji ndiqen me padi private, ndërkaq veprat penale nga neni 200 deri në nenin 203 të këtij ligji ndiqen në mënyrë zyrtare (ex officio).

#### **7. Konfiskimi**

##### **Neni 204**

Gjërat e përfituara nga kryerja e veprave penale nga neni 200 dhe 201 të këtij ligji konfiskohen.

#### **8. Shpallja e aktgjykimit**

##### **Neni 205**



205.1. Me kërkesën e prokurorit ose të palës së dëmtuar dhe në rast se provohet interesi i justifikuar, gjyqi urdhëron botimin e aktgjykimit në masmedia.

205.2. Gjyqi cakton vëllimin, mënyrën dhe llojin e botimit të aktgjykimit.

## **Kapitulli 2**

### **Shkelje Administrative**

#### **Neni 206**

206.1. Me gjobë prej së paku 500 deri në 50.000 € dënohet për shkelje administrative personi juridik i cili, në kuadër të veprimtarisë së vet a në biznes me të tjerët, e shfrytëzon pa leje veprën e autorit ose lëndën nga të drejtat e afërta.

206.2. Me gjobë prej më së paku 500 deri në 10.000 € dënohet për shkelje administrative nga paragrafi paraprak i këtij neni edhe përfaqësuesi ligjor i personit juridik.

#### **Neni 207**

207.1. Me gjobë prej së paku 500 deri në 50.000 € dënohet për shkelje administrative personi juridik i cili, në kuadër të veprimtarisë së vet a në biznes me të tjerët:

- a) kryen çfarëdo veprimi të shmangies së masave efektive teknologjike të mbrojtjes (neni 185);
- b) kryen veprimin e heqjes a të ndryshimit të informacionit elektronik të administrimit të të drejtave (neni 186).

207.2. Me gjobë prej së paku 500 deri në 15.000 € dënohet për shkelje administrative nga paragrafi (1) i këtij neni edhe përfaqësuesi ligjor i personit juridik.

207.3. Me gjobë prej së paku 500 € deri 10.000 € dënohet personi i cili kryen shkelje administrative e përcaktuara në paragrafin 1 të këtij neni.

## **Neni 208**

208.1. Me gjobë prej së paku 500 deri në 25.000 € dënohet për shkelje administrative personi juridik i cili:

- a). nuk ia dërgon Zyrës brenda afatit të dhënat për llojin dhe numrin e mjeteve të shitura ose të importuara për fiksimin e zërit ose pamjeve, për fotokopjim, të bartësve të zbrazët të zërit ose pamjeve si edhe të dhënat për numrin e fotokopjeve të bëra, që nevojiten llogaritjen e kompensimit të veçantë;
- b). nuk ia dërgon Zyrës njoftimet, të dhënat a programet, në mënyrën dhe afatet e parashikuara me këtë ligj dhe me aktet e Zyrës, e që janë me rëndësi për llogaritjen e kompensimit të veçantë;
- c). i pamundëson Zyrës kontrollin e dokumentacionit që ka të bëjë me detyrimin e dhënies së informacioneve.

208.2. Me gjobë prej së paku 500 deri në 10.000 € dënohet për shkelje administrative nga paragrafi (1) i këtij neni edhe përfaqësuesi ligjor i personit juridik.

208.3. Personi fizik që kryen shkelje administrative nga paragrafi (1) i këtij neni, dënohet me gjobë prej 500 deri në 10.000 €.

## **Neni 209**

209.1. Me gjobë prej së paku 2.500 deri në 10.000€ dënohet për kundërvajtje shoqata grumbulluese e themeluar sipas nenit 170 të këtij Ligji nëse:

- a). nuk mban ose i mban me pakujdes evidencat dhe kontabilitetin;
- b). nuk ia përcjell titullarit të së drejtës të ardhurat e tërësishme që i takojnë nga kompensimet e mbledhura prej shfrytëzuesve të lëndëve të mbrojtura;
- c). nuk përfill kërkesën për revizionin e veprimtarisë financiare nga ana e revizorëve të pavarur;
- d). nuk i kryen detyrimet ndaj organit mbikëqyrës ose nuk i zbaton masat që ai organ ka urdhëruar për mënjanimin e parregullsive në punë.

209.2. Me gjobë prej 1.000 deri në 3.000 € dënohet për shkelje administrative nga paragrafi paraprak edhe përfaqësuesi ligjor i agjencisë kolektive.

#### **Neni 210**

Gjësendet e përfituara me kryerjen e shkeljeve administrative nga neni 207 dhe 208 të këtij neni konfiskohen, në përputhje me ligjin në fuqi dhe cilindo legjislacion që duhet të hartohet në këtë fushë.

#### **Neni 211**

Procedura për shkelje administrative fillon me kërkesën e organit të inspektimit, policisë, palës së dëmtuar, organit të administratës kompetent për Pronën Intelektuale ose të Zyrës.

#### **Neni 212**

212.1. Kur personi i autorizuar i inspektimit apo i policisë, gjatë veprimeve të mbikëqyrjes ka dyshim të bazuar se është bërë shkelje administrative nga neni 207 deri në nenin 208 të këtij ligji, ai mund të sekuestrojë përkohësisht mallrat, mjetet ose materialet që janë përdorur ose që janë dedikuar për shkelje administrative ose që janë përfutur nga kryerja e shkeljeve administrative, në përputhje me ligjin në fuqi dhe cilindo legjislacion që duhet të hartohet në këtë fushë.

212.2. Gjërat e sekuestruara përkohësisht, në kuptimin e paragrafit paraprak, menjëherë dhe tok me propozimin për nisjen e procesit për shkelje administrative, i dorëzohen autoritetit kompetent për veprim të përshtatshëm.

## **PJESA VII**

### **MBROJTJA E PERSONAVE TË HUAJ**

#### **1. Rregulla të përgjithshme**

##### **Neni 213**

213.1. Personat e huaj fizikë ose juridikë (personat e huaj) gëzojnë mbrojtje të njëjtë të të drejtës së autorit dhe të drejtave të afërta sikur edhe personat vendës, kur kështu parashikohet me marrëveshje ndërkombëtare ose në këtë ligj ose kur ekziston reciprocitet faktik.

213.2. Autorët dhe interpretuesit e huaj në çfarëdo rasti gëzojnë mbrojtje të njëjtë të të drejtave morale që njihen nga ky ligj.

#### **2. Autorët**

##### **Neni 214**

214.1. Mbrojtjen sipas këtij ligji e gëzojnë autorët e huaj:

- a). që kanë vendbanim të përhershëm në Kosovë;
- b). ndaj veprave të botuara për herë të parë në Kosovë ose të botuara brenda 30 dite, prej ditës kur janë botuar në ndonjë vend tjetër;
- c). ndaj veprave të publikuara për herë të parë në Kosovë;
- d). ndaj veprave arkitekturore dhe të arteve figurative të cilat në territorin e Kosovës janë patundshmëri ose janë pjesë integrale e një patundshmërie.

214.2. Nëse vepra e autorit është krijuar nga disa autorë, ata të gjithë gëzojnë mbrojtje sipas këtij ligji edhe kur vetëm njëri prej tyre i plotëson kushtet nga paragrafi paraprak .

### **3. Interpretuesit**

#### **Neni 215**

215.1. Mbrojtjen sipas këtij ligji e gëzojnë interpretuesit e huaj:

- a). që kanë vendbanim të përhershëm Kosovë;
- b). interpretimi i tyre është bërë në territorin e Kosovës;
- c). interpretimi i tyre është fiksuar në fonogram dhe videogram i cili gëzon mbrojtje sipas këtij ligji;
- d). interpretimi i tyre i pafiksuar në fonogram, është përfshirë në emision radioteleviziv që gëzon mbrojtje sipas këtij ligji.

215.2. Nëse në interpretim marrin pjesë disa interpretues, ata të gjithë gëzojnë mbrojtje sipas këtij ligji edhe kur vetëm njëri prej tyre i plotëson kushtet nga paragrafi paraprak.

#### **4. Bartësit e tjerë të të drejtave të afërta**

##### **Neni 216**

216.1. Mbrojtjen sipas këtij ligji e gëzojnë bartësit e tjerë të huaj të të drejtave të afërta të cilët kanë vendbanim të përhershëm apo seli në Kosovë.

216.2. Mbrojtjen sipas këtij ligji e gëzon prodhuesi i fonogramit për fonogramin, përkatësisht producenti i filmit për videogramin që për herë të parë është fiksuar në Kosovë.

216.3. Mbrojtjen sipas këtij ligji e gëzon botuesi në kuptim të të drejtave të afërta nëse, edicioni i tij është botuar për herë të parë në Kosovë ose brenda 30 ditë nga dita e botimit në ndonjë vend tjetër.

216.4. Mbrojtjen sipas këtij ligji e gëzon Transmetuesi, emisionet e të cilës transmetohen nëpërmjet rrjetit transmetues që është në territor të Kosovës.

216.5. Mbrojtjen sipas këtij ligji e gëzon prodhuesi i bazës së të dhënave, nëse ajo bazë është bërë për herë të parë në territorin e Kosovës.

#### **5. Komunikimi i publikut me anë të satelitit**

##### **Neni 217**

217.1. Mbrojtje sipas këtij ligji gëzojnë titullarët e së drejtës së autorit ose të të drejtave të afërta, kur vepra e tyre ose lënda nga të drejtat e afërta i komunikohet publikut me anë të satelitit, nëse nga territori i Kosovës dhe nën kontrollin dhe përgjegjësinë e Transmetuesit dërgohen sinjalet përkatëse të programit në një zinxhir të pashkëputur komunikimi që shpie deri te sateliti dhe prapa në tokë.

217.2. Mbrojtja sipas këtij ligji ekziston edhe kur nuk përmbushet kushti i mësipërm, nëse:

- a). në Kosovë gjendet pika e lidhjes marrëse nga e cila drejtohet transmetimi i sinjaleve të programit;
- b).transmetuesi që ka porositur transmetimin e programit me anë të satelilit është me seli në Kosovë.

## **6. Krahاسimi i afateve të mbrojtjes**

### **Neni 218**

Për titullarët e huaj të të drejtave të afërta që gëzojnë mbrojtje sipas këtij ligji, vlejnë afatet e mbrojtjes të caktuara me këtë ligj, por skadojnë më së voni në ditën kur skadon mbrojtja në shtetin që i përketin si shtetas ose ku kanë vendbanimin apo selinë dhe nuk mund të zgjasin më shumë se kohëzgjatja sipas këtij ligji.

## **7. Personat pa shtetësi dhe refugjatët**

### **Neni 219**

219.1. Autorët dhe bartësit e të drejtave të afërta që nuk kanë shtetësi ose kur ajo nuk mund të verifikohet, gëzojnë mbrojtje të njëjtë sikurse bartësit vendor të të drejtave, nëse kanë vendbanim të përhershëm në Kosovë.

219.2. Nëse nuk kanë vendbanim të përhershëm apo vendbanimi nuk mund të verifikohet, gëzojnë mbrojtje të njëjtë sikurse bartësit vendor të të drejtave, nëse kanë vendbanim të përkohshëm në Kosovë.

219.3. Nëse në Kosovë nuk kanë as vendbanim të përhershëm dhe as vendbanim të përkohshëm, gëzojnë mbrojtje në Kosovë sikur qytetarët e shtetit në të cilin e kanë vendbanimin e përhershëm apo të përkohshëm të tyre.

219.4. Dispozitat e këtij neni janë të barasvlefshme dhe për autorët dhe bartësit e të drejtave të afërta të cilët, në përputhje me traktatet ndërkombëtare ose me ligjin e Kosovës, gëzojnë statusin e refugjatit.

## **8. Reciprociteti faktik**

### **Neni 220**

Reciprocitetin duhet ta dëshmojë ai i cili thirret në të.

## **Pjesa VIII**

### **DISPOZITAT KALIMTARE DHE PËRFUNDIMTARE**

### **Neni 221**

221.1. Ky Ligj zbatohet për të gjitha 'veprat e autorëve dhe interpretimet e interpretuesve, të drejtat pronësore të të cilëve nuk kanë pushuar deri në ditën kur ky Ligj hyn në fuqi.

221.2. Ky Ligj gjithashtu zbatohet për fonogramet dhe për interpretimet e incizuara mbi të, incizimi i parë i të cilëve është bërë brenda pesëdhjetë vitesh para fillimit të vitit kalendarik kur ky Ligj ka hyrë në fuqi.

221.3. Procedurat e inicjuara për mbrojtjen e të drejtave të autorit dhe të drejtave të interpretuesve, të cilat nuk janë përfunduar deri në ditën kur ky Ligj hyn në fuqi, do të finalizohen në pajtim me urdhëresat administrative të cilat kanë qenë të plotfuqishme në ditën kur ky Ligj hyn në fuqi.



221.4. Ky Ligj zbatohet për videogramet, për transmetuesit dhe botimet e botuesve, si materiale me të drejta të përafërta, të cilat së pari janë caktuar, transmetuar ose janë botuar ligjërisht pas hyrjes së tij në fuqi.

221.5. Kontratat mbi të drejtat e caktuara, të cilat janë lidhur para hyrjes në fuqi të këtij Ligji, nuk mund të ndryshohen me argumentimin se duhet të jenë në harmoni me këtë Ligj.

221.6. Zyra do të nxjerrë legjislacion mbi kriteret që i referohen këtij Ligji brenda një periudhe tetëmbëdhjetë muajsh, nga dita e hyrjes në fuqi të këtij Ligji.

## **Neni 222**

Ky Ligj shfuqizon çdo dispozitë të ligjit në fuqi që nuk është në përputhje me të.

## **Neni 223**

Ky Ligj hyn në fuqi pas miratimit në Kuvendin e Kosovës dhe shpalljes nga Përfaqësuesi Special i Sekretarit të Përgjithshëm.

**24.08.2006**

**UNMIK/REG/ 2006/46**